

KOPI MO FAASAOSAOGA TALAFEAGAI A SUI USUFONO

ASO LULU, 24 IANUARI 2018

Na toe faaauau Tualumaga a le Fono Aoao Faitulafono i le itula e 7:00 i le afiafi.

TULAFONO TAU FAAOFI O LE FAATATAUINA O TUPE FAAOPOOPO (NU.1) 2017/2018 - felafolafoaiga faaauau i luga o le faitauga faalua

FOFOGA FETALAI: Ou te faatalofa atu ma le agaga faaaloalo i lenei vaega o le tauafiafi, e momoli atu le faamalo ma le faafetai, malo le tauatai, malo foi le usufono, ua maua le malosi e faaauau ai le tatou galuega.

Ou te faasilasila atu ua toe amatalia nei Tualumaga ma Galuega a le Fono Aoao Faitulafono. E faia le malologa i le aoauli ua sola ua faaii mai le saunoaga a le Sui Fofoga Fetalai po o le sui usufono mo Gagaemauga Nu.3. Ma ua avanoa nei foi le tatou Palemene mo se sui usufono e tulai mai e fia fai sona sao ma saunoa e tusa ai o le tatou galuega.

Tulai mai le sui usufono mo Aleipata Itupa i Lalo oe le Matua.

Afioga TAFUA MALUELUE TAFUA (Aleipata Itupa i Lalo): Lau Afioga i le Fofoga Fetalai faafetai ua maua si nei malologa e toe amatalia le tatou Fonotaga i lenei itula o le taeao na liugalua, e faatalofa atu ai i lau Afioga faapea foi le paia o le Palemene o lo o sasao nei, faamalolosi mai i lenei afiafi mafanafana. Na o le tolu lava nai vaega e fia oo i ai sau tautalaga lau Afioga i le Fofoga Fetalai, e pei lava foi o tatalo masani a tatou pe a fai fononatalo e muamua ona ole atu i le Malo, lua, o se tatalo mo galuega ia e fia faia, po o se faamagaloga foi o le itumalo pe afai o sese i le tuai ona faia o galuega. A o le a muamua tuu atu nai fautuaga e uiga i le Tala Faatatau Faaopoopo o le Tupe o lo o i ai. E le tele foi se sao o lenei itumalo i le Tala Faatatau Faaopoopo o le Tupe aua na o le \$24+miliona lea ou te tilotilo atu o lea e i ai. Ae i ai lava nai fesili laiti e fia tuuina atu i lau Afioga i le Minisita o Tupe, faafetai o lea e te afio mai o le vaega lea na fesiligia ai le seleni na aumai, o le tupe mai a tatou paaga mai fafo aua pe a ma le fa tausaga e le i faatinoa lea poloketi na fai. O lea ou te tau maua atu i le Lipoti a le Komiti o Tupe i le itulau 19 ea lea e sau ai, lea e faapea ua fai si tuai, ua fa tausaga talu ona faamatuu mai le seleni lea ae o lea e le i faatinoa lea poloketi, pei lava o le auala foi lea e au atu ia Saina agai le malae vaalele. Ia atonu o le mafuaaga lea e tau tilotilo atu i ai e faapea ua faalavelave nisi i le faiga o le auala po o mea tau fanua, ae fia maua pea se tala sao mai lau Afioga e fia malamalama i ai lou nei sui usufono.

O le isi vaega ou te fia tuualalo atu ai ma le faaaloalo i le tatou Malo, o le tatou Tulafono foi lea o le Land Alienation Act po o le fanua foi lea lisi faa-

Samoa. Na o se tuualalo lava, o le Tulafono ia i lau maitau i ai, o la e manino ma malamalama, a o le mea lea e faaletonu i lou lava talitonuga, e le o lava se faailoilo, e le o lava se faailoa i lo tatou atunuu. E le faapea a fai le Tulafono o lona uiga o le a lolofi uma mai tagata e fai o latou fanua ma Sao o aiga ma aiga foi, o le a lisi o latou fanua, e leai. O le a lisi o latou fanua. E leai, o le Tulafono lava ia tatau ona faailoilo e le tatou Malo, o le Tulafono e na o se taiala, e le faapea a fai loa o le a compulsory tagata uma e fai a latou lisi.

O lona lua, e manatu le sui usufono o faailoilo foi nei e faailoa atu ai i le tatou atunuu aua o lea e ave sese le tala lea faapea o le malamalama i le Tulafono. E leai, o la e manino foi i le Afioga i le Loia Sili ma le latou Matagaluega aemaise o le polofesa i Tulafono lea ou te vaai atu lea e alaala mai tua le Afioga ia Teleiai. A o le fesili taua, na ou fesili i isi vaega o loia sinia o le tatou atunuu ma atunuu i fafo i le tatou Tulafono lea, a o le tala, e le....

FOFOGA FETALAI: Ou te faamalulu atu i le sui usufono mamalu, ne i tuuaia au e le Malo ua le faatinoina lou tiute faa-Fofoga Fetalai i le tausiga ma le puipuiga o felafolafoaiga, ona o le Tulafono lea na e saunoa i ai, e le i faitauina i lona faitauga faalua. E faamalulu atu se i oo atu i lona taimi ona.... ae manaia pe a e saunoa pea i le tulaga tau tamaoaiga ma mea tau tupe a le Malo.

Afioga TAFUA MALUELUE TAFUA: Ia faafetai o lea ua maua atu lou finagalo, faafetai. Ona ou oo mai lea, o au ou te ava tele i lau Afioga, ae faafetai lava e saolele lava lau saunoaga, ae pei o le lagona lea e avatu, o nai tuualalo. E le i faapea pe le i oo i ai pe oo i ai, a o lea na ona tuualalo atu i lenei taimi ne i te i ua fai mai ua malaga se isi i fafo i mea nei o asiasiga faafomai.

Ona ou oo mai lea i le vaega lea o le tuualalo atu i le tatou Malo, le vaega lea o le tatou Immigration Act, lea sa manino lava i le tausaga talu ai le mea e ala ai ona sitiseni le tagata. O le popolega ia te au ma lou lava sui usufono faapea foi le matou itumalo, matou talatalanoa lava ma nisi o toeaia, o le latou fautuaga, o le mea lea e tupu, e sau loa le tagata i nei i le tulafono fou lea e le i faatinoa e sau i le tolu masina, afai la e sau le tagata i le tolu masina ma nai seleni e tau atiae ai ma invest i nei i le tatou atunuu, o le mea ua tupu mai, e lava le taimi lea e nofo ai le tagata investor lea i se tamaitai Samoa po o se alii Samoa ma maua ai lona sitiseni. O lona uiga, o lea la tagata o le a i ai lona sitiseni ma aia ai e faatau fanua o Samoa. O le popolega tele lea ia te au. E tatau ona i ai sina mea i le Tulafono e faafaigata ai ona faatau o tatou fanua e tatou sitiseni fou nei. E tatau lava ona tatou matua puipui ma silasila i tatou measina ia ma fanua, silasila i le Tulafono, pe le tatau ona tuu i ai sina vaega i totonu o le Tulafono e faafaigata ai ona faatau o tatou eleele tumaoti i tagata faatoa tai tasi, lua, tolu tausaga e oo lava i le lima tausaga. Pe manaia sina aiaiga pe atoa loa le 10 tausaga ua tatou vaai atu ua establish le tagata ua mautinoa o lea ua masaa mai lana faananuaga i totonu o Samoa, o le tagata tonu lona e tatau ona faamatuu i ai le fanua. Ma le faaaloalo.

Ona ou oo mai lea i le isi vaega lea e tuualalo atu ai, o le vaega lea o le tulaga foi lea i le faamanuiaga mo Le Ao o le Malo po o se Palemia ua leva ona Palemia, pei o le Afioga Tuilaepa, po o le tagata foi nei tualoa o le tatou Malo lea e i ai faamanuiaga lea o lo o ave i faletua po o masiofo a e sa avea

ma Ao o le Malo, ua tuumalo Le Ao o le Malo po o faletua foi o e sa avea ma Sui o le Fono a Sui Tofia. I lou talitonuga, manaia pe afai tatou te silasila totoa i le Tulafono, toe suia le Tulafono mo se faataitaiga afai e uma le lima tausaga o le Afioga i le Tuiaana faaopoopo le isi lima tausaga. E uma loa le lima tausaga lena, i lou lava manatu na o au, o le manaia ia pe a tatou faia se aiaiga a malolo mai le Afioga i le Tama a Aiga, tuu i ai se taavale, tuu i ai ma sana failautusi, ia po o sina tamai tupe o se remuneration, po o se tupe e tausi ai le sa avea ma Ao o le Malo. O tofiga taualoa o le tatou Malo, e manaia pe a tatou silasila i le tulaga lea ma lou faaaloalo.

Ona ou oo mai loa lea i nai talosaga laiti mo si o matou itumalo, o lea ua uma atu le tuualalo i a outou Afioga mamalu, toe tasi lava le mea lea ua pau ia te au, o lea ou te tilotilo atu sa ou tusia le redundancy o nai tagata, sa taua e nisi i le taeao nei mo nai tagata foi nei e le na ma se laina ua lava foi le silafia ma le iloa e le tatou Malo, o fuafuaga mo nai tagata ia aua o lea ou te faalogo o le a merge le falemai ma le vaega foi lea o le National Health. Ia, e pei lava ona maua le tala i le Aso Gafua, e 20 pe a nai tagata o le a malolo mai ai i le vaega pe o le a redundant mai le falemai. Ia na o se tuualalo lava e faaopoopo atu ai i nisi o sui usufono sa saunoa atu e manaia pe a silasila totoa le tatou Malo i nai faamanuiaga mo nai tagata nei. E talitonu lava le agaga o lea ua silasila i ai, ae manatua foi o tatou tagata e le o ni tagata ese, faapea foi ma nai alii leoleo.

Ona faaopoopo atu ai lea o se manatu semeamanu o lea ou te i ai i le vaega lea o leoleo ma le falemai, e manaia foi pe a silasila lau Afioga i le Minisita mo le Soifua Maloloina ma le Minisita mo Leoleo, pe le i alagataua ona toe review po o le iloiloga o totogi o tatou fomai ma le au tausimai uma lava, e le gata i lena, faapea foi ma leoleo. O lou talitonuga, o le manaia ia pe a sui le entry code. O le taimi nei po o le Year 13 lena e i ai le Kolisi a Leoleo, ae manaia pe a sii i luga i le Diploma po o ni faailoga e fuafua i ai le 200+ ma ona tupu tagata lea e iu mai le tatou Iunivesite i tausaga uma. O lea la e manaia foi e maua ai nai galuega a le aufaaui mai le Iunivesite i tausaga uma, a ua maua luga ma siisii lea tulaga. E le afaina lava leoleo o lo o i ai nei o la e ua faaaui pea le latou auaunaga. Na o se tuualalo i lau Afioga i le Minisita ma le faaaloalo, pei e manaia ae silasila i lea vaega ma le faaaloalo lava.

Ona ou oo mai lea i nai molimano mo si ou itumalo. E muamua ona ou faafetai i le Afioga i le Minisita mo Fesootaiga ma Faamatalaga Tekonolosi le Afioga Afamasaga. Faamolemole lau Afioga, pe mafai ona e tali mai pe a e lauga mai se i faafofoga lou itumalo i le mea sa faaletonu ai le matou TV ma le matou leitio i taimi ua tuanai. E le masalosalo foi le matou taofi, faafetai i lau faalototele ma le faalaeiau ua matua fiafia lava lou loto i lau saunoaga sa fai si faaletonu o le matou TV ma le leitio, talu ai ona o Tutuila. Atonu o lo o faafofoga mai le tatou nuu ia Tutuila, se i silasila ane i le vaega lea po o le a le mea ua clash ai ma ua faaletonu ai le reception a matou i tua. O le isi vaega e talosaga atu ai faafetai i le Afioga i le Minisita mo Aoga, o la e sioki lava matou faiaoga ma le faaaloalo lava, pei ona ou tuualalo atu i lau Afioga i le aso ananafi, ae faamoemoe pea i lau Afioga pe toalua nai faiaoga, o le matou primary la e sioki lava faiaoga e faapena foi ma le kolisi. A maua se avanoa foi e te asiati atu ai i matou aoga ia, ua manaia foi. O le matou itumalo e i ai le aoga primary school i Tiavea, primary school i Samusu, primary school i Saleaamua, primary school i Lotopue ma le primary school i Satitua. O lona uiga e lima nuu, ae faafetai ai foi i le Afioga i le Minisita mo Galuega o lea

ua fai le auala o le faleaoga o Satitua sa matua leaga faia lava le auala lea. Faafetai ai i le tali mai foi o le taumafai atu, aua o le tala a le itumalo, e le o ano atu le sui usufono i lea auala ua leva ona tiai. Na gata lava le faiga o le auala lea ina ua asiasi mai le Kovana Sili o Niu Sila, sa tali e le aoga a Satitua, felelei atu helicopter land ai i le malae gata ai lava i ina le tanuina o le auala. Ae faafetai o lea ua faatino lea vaega, e pau lava le tuualalo ma le faaaloalo, se i alofagia nai auala o Saleaamua Primary School, e le atoa se 400mita, palapala le auala lea, atoa foi ma le aoga lea a Lotopue, aemaise foi le matou kolisi o Vaisuli i Aleipata, e faaletonu lava, ailoga e atoa se 100mita o le auala. Masalo pe na o se 80mita pe a umi tele e tau ai i le faleaoga. Faamolemole se i silasila ane i ai pe a maua se avanoa.

Ma le isi mea lau Afioga i le Minisita mo Galuega, faafetai lava foi mo le manatu mai i lenei itumalo. Ua fai sina leva o ou lauga soo lava i le mea lea ae se i toe faamanatu atu na o le tuualalo atu lava ma le faaaloalo, o le vaega foi lea o si o matou nuu sa aafia i le Tsunami, mo le silafia e le Maota, e lima nai tagata maliliu o le matou nuu ma le fautuaga na aumai i le Malo e o i uta e nonofo i uta tagata. E faapea la ua sifi i uta le toatele o tagata ma e lua auala galue na fai ai e tai kilomita le umi, a o le faalavelave ua fai le isi auala e le i au i le mea e toatele nai isi tagata o lo o nonofo ai, masalo foi o le vaega lea ailoga pe le atoa se afa maila pe a tele tele pe na o se 600mita pe a, ioe, po o se mea faapena. O lea e talosaga atu ai ma le agaga faaaloalo, tau lava ina sua, ae ia laulelei le mea e savavali ai nai tamaiti aoga ma nai aiga, e le toatele foi aiga masalo pe na o se sefulu ma ona tupu.

A o ou i auala lava, faafetai foi i lau Afioga i le Minisita sa saunoa e uiga i le auala lea i Tiavea, le auala lea sa maliliu ai tagata e toafa po o le tolu i le fa tausaga talu ai. Faafetai o lea ua maua le tala ua maua le seleni e faatino ai lea galuega, masalo po o lea tausaga po o le tausaga i ona tua atu e faatino ai le faamoemoe mo le auala lea. E momoli atu ai le agaga faafetai ma le faamalo, faafetai foi i a outou Afioga i Minisita.

Ona ou oo mai lea e le i uma lau tala i le Minisita mo Aoga, o lea ou te maua po o le masina o Mati e fusu ai le tama tautaua foi lea a tatou o Laauli Joseph Parker. Ia ou te iloa lau Afioga o oe o le Minisita o Taaloga. Ou te lagolagoina le mau a le sui usufono ua mavae sa saunoa e tataua ona e malaga e fai oe ma sui usufono o le tatou Malo, pe a avanoa foi le Afioga i le Palemia lua te malaga e tapuaia faiva o le tatou tama fusu, o le a matou tapuai atu foi. Ae tasi lava si faaopoopoga lau Afioga, manaia suega, ma se i alofa, avatu ni faailoga o matou tamaiti i Aleipata lea e sili aoao lava e le gata i le Iunivesite, ae faapena foi i le kolisi. O lea e maua le tala o la e manuia nai a matou tamaiti pe toalua pe toatasi. A o lea e leai lava se faamanuiaga o avatua, ou te le iloa po o ai e pau i ai le vaega lea. Ma le faaaloalo.

O le Minisita mo Tina ma Tamaitai, Atinae o Nuu, Afioga ma Agafesootai, ou te manatu i nisi o tala sa talanoa i le workshop i le Aso Gafua, e faatupu manatu ai foi le vaega lea o tatou komiti tumama. O nai vaega lava na sa sau i la aso, sa i ai le mea foi lea a faapea e komiti le loomatua, e alu atu lava i le falemai po o lona aiga pe na o le \$5 ea le totogi ae a faapea e le fai komiti ia ua \$10. E pei se incentive le mea lena i le taimi lenei pe a toe fafagu le vaega lena. A o le taua ia o le mea lena, a o le taua ia o le tatou fale komiti, e mafai foi ona asiasi atu ai le fomai foi lele le local doctor lea e alu atu i le falemai i Lalomanu ma asiasi i isi itumalo po o Falealili, Lepa ma Saleapaga, ma matou nuu o matou i tua. A o le tuualalo i lau Afioga i le Minisita mo le

Soifua Maloloina, e tasi lava le asiasiga lea ou te faalogo e alu atu i tua i le matou falemai. Ae a pe a Aso Gafua ma le Aso Faraile, pe tailua i le vaiaso, e pule lava lau Afioga i ni nai aso se lua e asiasi atu ai le fomai ae moomia lava le vaega lea. O le taua foi o asiasiga na, a faapea e toe fafagu tatou fale komiti ia e fai ai tumama ma aga faapena lea e faaoga mo tamaiti foi nei e gasegase, ma le tele lava o mai e avatu i le fale komiti ona asiasi atu lea o le teine fomai le nurse, ia a asiasi atu ai ma le fomai pe tasi pe lua ni nai itula, o se vaega manaia lea, ma le faaaloalo.

Lau Afioga i le Minisita mo Faatoaga, faafetai lava, faafetai ia Laauli mo lona taimi a o Minisita o Faatoaga. Lau Afioga lea sa avea ma leo malosi o le tatou Komiti o le Infrastructure, na pau le talosaga, o le manu ainiu ia matou, ou te iloa e le fuatasi i Aleipata, o le matua tele lava o le faaletonu o lo o i ai i le taimi nei. Faafetai mo le poloketi lea na fai na maua ai le matou \$3,000 ma ona tupu, toeitiiti \$4,000 le matou tupe na maua, ae a fai ni nai mea faapena, le mea foi lea e o taulelea e ao mai le manu ainiu ae maua ai ni a latou seleni, ia e manaia e pei o se incentive e collect ai not only e radicate ai le manu ainiu, ae la e manaia foi e fesoasoani i lea tulaga aemaise ua matua faaleagaina lava ia matou niu vaeatu le paia o le Maota ma le faafofogaaga a Samoa.

Ona ou oo mai lea i le Minisita mo Punaoa Faalenatura ma le Siosiomaga, o le Minisita mo Galuega ma le Minisita o le LTA, o le vaega lea o lea e fai lava sina feteenai o le vaega lea i le matau a le matou Komiti, lau Afioga i Minisita o Tupe te i ua pau ia te au, o le tala lava lea e omai ma le matou vaega lea e i lalo o le matou Komiti, e faaletonu ia latou paketi aemaise lava i le faiga o latou auala ia e i ai nei ma isi mea ia e faaletonu, fai mai lava latou e soona tatipi e outou ia tupe a faalapotopotoga ia, e tuualalo atu ai se i silasila totoa i le vaega lea, o le mea lea e alalaga ai le atunuu pe a timuga aso pe a faaletonu le tau ua omoomo auala, ua faaletonu. A lea a fai atu foi i nai faalapotopotoga ia, o le latou tali, ua tele lava le sesele a le aualii ia le Afioga ia Sili ma le vaega o tupe. Se i silasila totoa i paketi a nai tatou SOES aemaise le vaega lea o lo o faia galuega tetele a le Malo, EPC o le Vai, ma le aufai auala le LTA ma le Ofisa o Galuega.

Ona ou oo mai lea i le MNRE ma le faaaloalo, leai e le aia lou nei moo i liu o vaa, na ona tuualalo atu, po o le a se fesoasoani e maua mai e fesoasoani ai i paketi a se vaega sia pe a oo atu i luma o a outou Afioga.

Masalo ua uma le lauga a le tamaloa Aleipata, ae malie se i fai sina au upu i lou itumalo, ona ou nofo ai lea i lalo. Ou te faatulou atu i le faafofogaaga a Samoa pe afai ua paopapa se tala ua fai atu, ia aemaise le Aufaigaluega a le Atua.

Ou te faatalofa atu ma ou faafetai atu i lou itumalo, faamanuia atu i lenei aso ua lata ina faaii le masina fou, ia faafetai le tapuai, faafetai foi mo a outou tatalo, ia aemaise le Aufaigaluega o lo o feula le mulila ma tapuai mai outou faiva i manu ma talosaga. Ia tatou feiloai i le Aso Sa a sau, ia ma talosaga ai ia tatou fanau, alo ma fanau, aua aoaoga o le a amata o lenei tausaga.

Ia e faaii atu ai le faafetai i le Taitai o le Malo ma le latou vasega i le Kapeneta, ia faapea foi sui Minisita, aua le avea lau Sui Minisita Sola leaga te i ua ita fasi le tamaloa lea o Joshua pe a faiaina ai le tatou tama, ae manaia pe a lua o te lua toalua e fai ma au bodyguard.

E faafetai atu i CEOs, o Faauluuluga o Matagaluega, faapea foi Faauluuluga o Matagaluega Tumaoti a le Malo, le Afioga i le Loia Sili ia faapea foi le

tamaitai o le Maota, le Failautusi o le Maota ia aemaise ia le aufaigaluega a le Malo o lo o tatou faatasi ai. Faafetai mo a outou galuega faifaipea, faafetai foi mo lo outou filiga pe a talosaga atu matou nei i nai o matou faafitauli i nai o matou itumalo. Pau lava le agaga maualuga ia tatou galulue faatasi, e le o outou ma matou, tatou te tutu faatasi ma tatou galulue faatasi lea. O lena e iloa ai le maopoopoga o le Malo ma tatou. Ia faafetai i le tapuaiga a le Taitaifono o lenei itu aemaise o sui usufono sinia o le Maota o lo o i lenei itu. E momoli foi le agaga faafetai, tatou amata i lenei tausaga, ia tuli so tatou ai oi luma, agalelei le Atua i lau Afioga i le Fofoga o le Fono, maua lou soifua, ou te vaai atu lava pei ua e tau gasegase, taulu taulu i le finagalo o le Atua, ae o le a matou tatalo, ia vave ona e malosi, ae o le matou tala lea, ia agalelei le Atua i lau Afioga. Manuia foi le tapuaiga a Samoa o lo o faafofoga mai, ia manuia le Fono.

FOFOGA FETALAI: Ia malo, faafetai i le saunoaga i le tofa i le Matua, le paia i le sui usufono mamalu o Aleipata Itupa i Lalo.

Ia ma ua avanoa foi le Palemene mo se isi sui usufono e tulai mai e saunoa. Ia tulai maia le sui o Anoamaa Sasae.

Afioga ALAIASA MUAGUTUTIA MOEFAAUO MALAGAITUTOGIAI SEPULONA MOANANU (Anoamaa Sasae): E muamua lava ona ofo alofa atu lau Afioga i le Fofoga o le Fetalai, faapea foi le paia o lenei Maota, ia o lea foi ua tatou laa i lenei tausaga fou, ia avatu ai foi ma faamanuiaga o le tausaga fou e le gata i le tatou Maota, ae a le tapuaiga a le atunuu.

Ia o le a taumafai atu se sao o lenei itumalo, atonu foi o le talanoaina o lenei Tala Faaopoopo o le Tupe, ia o lo o agatonu i le tamaoiga o le tatou atunuu. Ae matou te le i utufia la le vai na momoo i ai le Tuiatua, ia e ao lava ona matou faapai ma faatulou aua le tapuaiga a lo tatou atunuu. Aemaise foi le tapuaiga mamalu O Le Ao o le Malo, Fono a Sui Tofia, ia aemaise le paia o Aiga ma Tama, Tama ma Aiga, faapea le Usoga a Tumua ma Pule, aemaise foi le afio o le Faamasino Sili ma le Ofisa o le Faamasinoga, ia ma le mamalu o Samoa o lo o faafofoga tapuai mai.

E i ai lava le manatu o lenei Tala Faaopoopo, sa leai se mea se Tala Faaopoopo i le tausaga na tea nei. O au la ua ou tau popole, leaga o mea nei o Supplementary po o Tala Faaopoopo, o i e siaki ai, tasi lenei check and balance o le tatou Malo. Ma e le mafai ona soona faia ni faaaogaina o tupe, ae le i aumai se i silasila i ai ia le Palemene ma avatu i ai sona finagalo ma pasia. Ia ae faafetai atu i le Afioga i le Minisita o Tupe, ia o lea lava matou te tilotilo atu i le Tala o le Tupe, ia o lo o i ai nisi o Matagaluega ua faasoina mai, o lo o i ai foi nisi o meaalofa, ia ma fetuunai faapena, ia aua le tulaga o le atinae o le tatou atunuu. O le mea lea e momoli atu ai le faamalo ma le faafetai i lo tatou Malo, ona o le magafagafa i mea lelei, aua e utiuti lava ia le tatou faasoa e le na ma le laina ia lena tulaga. Ia ae faalagolago foi i lo tatou malosi, i le fesoasoani mai o le Atua i lo tatou faamoemoe.

Ia e i ai lava upu e fai soo e isi tagata i le mativa, ia o lenei lava mea o le mativa, pei lava na i ai foi i le taimi o lo tatou Alii Faaola, sa i ai lava le mativa ia. Ioe e le mafai ona aveesea, a o le mativa, ou te talitonu, e amata mai i le mafaufau, o lena e nofo ai le mea lea o le mativa. A aveese loa la le mafaufau mativa, ona e mafaufau loa lea ua tamaoiga. Mo le poverty mindset ma le prosperity mindset, e mafua mai i le mafaufau.

O le mea foi la lea i le tatou atunuu, ia e tele ia o auala e faamanuiaina ai tatou e le Atua, ou te tatalo atu foi, gagau le vao, tele taumafa. O isi atunuu o lo o tau fai se faiga e aveese ai le fiaai, e eradicate ai le mea lea ua tau leai ni meaai, ia a o tatou, tele faamanuiaga a le Atua mo i tatou. O le mea foi lea e aumai i o tatou lima, o le upu a le Tusi Paia, o le lulu ma loimata, e selesele ma le fiafia ma le olioli. O Aua foi tatou te nofoai e faatalitali. O le mea foi lea i matua ma pule a alii ma faipule, o galuega e faia uma e le toatele, ia lagalaga mea lelei, ona tatou iloa lea, o lea e mafai e tatou ona fai le mea lea o le 1 tagolima ma le mativa.

Ia e i ai foi le fofona ou mafaufau i ai, leaga o lea ua fai le tatou vaalele, na ona uta lava o le vaega lea e faitio soo mai i le mativa, ona ave loa lea i le ituaiga atunuu lea e i ai Initia, ave i le tatou vaalele, na ona ave lava i ituaiga atunuu na, e 3 lava i le 4 vaiaso, tagi faasoloatoa i le toe fia sau iinei i Samoa. Ioe, se i ona vaavaai i le matautia o le mea e tau o le mativa, leaga o Initia, ua ou faitau i ai, toetiiti lava 50% le aumaumea, 50% le aumatitiva, ae 1.5pilion tagata, e 750miliona la tagata matitiva. So o se mea e te liliu i ai, e i ai lava tagata nei. O i i na la e te talitonu ai ma faapea ai, oi e leai la e sili lava Samoa.

E le faigofie le faamoemoe, ae o lo o i ou aao ma aao o le tatou atunuu, ia le manuia o le tatou atunuu. Ia lea ua tatou vaavaai ua aumai lipoti, faletupe tutotonu, lava le reserve la e i ai, mo mea aua le fefaatauaiga. O le mea lea e leai lava se mea e atugalua ai, o la ua i ai lea lauga i lo matou nuu ma le itumalo, lelei le tamaoaiga, lelei le faafoefoeina. Ioe, tiga le tele o taavale lea ua vevesi nei fai mai ua tele taavale i le Tulafono fou lea, ae le taitai ona sioti le penisini. O le mea lea e tiga ona leai ni a tatou penisini aua o tatou e leai ni penisini ma ni suauu e maua ai, ae lea lava e maua, ona o le a? O lea e lelei le faafoefoeina o le tamaoaiga o mea ia. O le mea lea i le atunuu, e leai se mea tatou te popole ai. O lo o lelei faafoe le faamoemoe, ia ma le alu o atinae o lo o fai lelei. Ia o le matou lea tala e uiga i le tamaoaiga.

E fautua atu foi i le Taitai o le Malo ma le mamalu o le Kapeneta, ou te manatua lava taga o le faiva lea o le tauta. Ioe, a taatitia loa ia le upega ma le uto ona sasa lea o le alititai, ioe, a le sasa le alititai, e le logo figota, o i ina faatoa maua ai ai o le faamoemoe. A matou sasa atu foi i nai motugaafa a matou, ia lava le onosai, lava le onosai, lea ua taatitia faiga faavae ma mea uma. Ae a avatu nai o matou manatu, ia a le talia lava ia faatafea foi i le nuu e leai ni mea e maua ai, ae talia na o ni nai mea, ia aoga e fatufatu ai lo tatou sa.

Ia a ae manuia le faiva, ia ona faapea lea tautai ae ua manuia, maua ai, e faapena le tapuaiga aua o lo o tapuai mai nuu ma afioaga, ia aua le alofaiva o le Palemene. O nai mea laiti lava ia, sa ou lauga i le vaalele lea talu ai i le Tala Faatatau o le Tupe, faafetai o lea ua fai le vaalele. O le mitamitaga foi lea o lou tagata, tau lau o le faamoemoe. Ia e le selu atu foi i le Afioaga i le Minisita, ae ia malie, o le tatou poloketi leni, e tataua ona, this is will be one of the most transparent, ia faailoa ma faailo uma i tagata, leaga ou te manatua i le 10 tausaga talu ai, sau le Tala o le Tupe \$10miliona, ae leai se vaalele leai ni tagata faigaluega ua tapuni le pisinisi. O le mea la lea ou te fai atu ai, e tataua ona fai mai se i fai atu ma vaavaai le atunuu, taumulimuli i mea ia, faailoa mea ia, o i ina, leai foi se faitio pe a malamalama tagata. Ia o le matou lea tuualalo, ae pule lava, aua e uma nei foi le Board leni faaletonu, toe iu mai lava lea i tagata o le atunuu le faamoemoe pe a faaletonu. Ae a manuia, tatou fiafia faatasi ma viia le Alii.

Ia o le manatu laitiiti lava lea i le Ofisa o le Faamasinoga, lau Afioga i le Minisita, se i silasila ane, ua fai lava sina aafia tele o matou mo mea foi lea o le tagata e fealuai fealuai lava faaulu le talosaga. E le fua tasi le mea lenei, o nisi o latou, e le matai, ae pei lava ou te lagona o le Tulafono faavae o le Faamasinoga o Fanua ma Suafa, e pei e faatatau agai i suafa matai ma e e umia suafa matai, se i toe silasila ifo lau Afioga i mea nei, ua avea foi le mea lenei o le aiatatau ma mea ua tele ai galuega a le Malo, ae se i toe fai ni faiga faavae lelei ina ia taofia ai faamolemole lau Afioga le tulaga lea. O nisi faaiuga ua leva ona i ai, ae avatu lava ma talia mai e le Ofisa ma toe lalaga mea ua uma ona taatitia. Ae o lau lea talosaga ma le agaga vaivai, ia se i toe silasila ifo lau Afioga i nei faamoemoega.

Ua alu alu nei le solotetee lea na fai, ae ua ou te i lava i lou vaai atu i le nusipepa o au foi ou te le faitau nusipepa tele, ae sau ai ua manaomia le faatagaina o le mea lenei o le mariuana, e legalise le laau lea o le mariuana. O se tofa ou te taua e au ia, e matua vaivai lava le mea e faavae i ai lenei tofa ma lenei manatu. O le mea lea e tele ai fonotaga a nuu ma afioaga i aso uma ma taimi uma o le foia o le faafitauli lenei, ioe. A tatou suesue lava i le amataga i le sauaina o fanau ma mea na, e taaloalo ai le mea lea i totonu i le faamoemoe lena, a o lea o le a omai tagata nei ma fai mai e faataga, ia o lena e i ina le tofa, se tatou toe vaavaai, ua le iloa po o fea po o le solotetee foi lea o tatou fanua Samoa aua o lea ua agai mai i isi mea, o mea e le tataua ona vaavaai i ai ia tagata o le tatou atunuu, ae aua foi tatou te faitio, ia ona ua pau lava o le mea ua oo i ai le soifuaga i lenei vaitau. Ae tuutuu atu, aua ne i tatou taumamao ma ia mea.

O nai auala o si matou itumalo. Oka! o nei i timuga ia, e fai lava a o lea e silasila i ai le Minisita faamolemole, o lea foi ua ou faalogo, o le a toe fai foi le auala lea e alu i le malae vaalele, ae le iloa po o anafea na gata ai le faaleleiina o le auala lea e alu i tua isi o matou itumalo, ae tasi lea auala e tui tele e tagata tafafao maimoa mai fafo, leaga o tua i lo matou itumalo o lo o tele ia tulaga ia o fale o turisi ma e tafafao maimoa mai fafo. Na ona tuu atu faapena, i le alu lea i i Luatuanuu e tau i Falefa, o le matua tautino atu, ia o lea foi ua uma ona saunoa atu i ai le Afioga i le Palemia, o mea nei o konekarate. Ae tatou te talanoa i le upu foi lea o le corruption e talanoa soo lava ma aumai i luma, a o i i lau matamata i ai i lea mea lea o auala, o i e mafua ai le mea lea, e pei e galulue faatasi tagata a le o le konekarate ma le...e pei e faapena le agaga lea e i ai e ala ai ona leaga auala, aua ana fai lelei, ou te talitonu e taatia mai lava le mea e alu i tulaga o specifications lelei e umi ona faaaoga. A o lau lea tuu atu i tulaga o i ai nei o tatou auala.

Ia e le umi sa matou tala, pau lava lea e na o nai manaoga laiti lava o si o matou itumalo o la e faafofoga mai, le paia i le susu ia Tumua ia Lufilufi aemaise foi ia le mamalu i Lalogafuafua o le Toaiga o Atua, ioe, tausi e le Toaono ma le Saofaiga, ma le mamalu ia te oe le Tumua, aemaise ou Fuaiala o Ki ma Tagata, Tai ma Fogatia. Aemaise foi si o matou nuu i le afifio o Aiga, Sa Fenunuivao ma aiga Sa Alaiasa, laua Matua ia Iuli ma Moeono Tagata o le Tuiatua ma le aai o le Tuputafaifa o Samoa.

E fai ai lou leo e momoli atu ai le agaga faafetai i la outou tapuaiga aemaise o la outou tatalo ua manuia ai faiva o le sui usufono o le tatou itumalo. Ia sagai ane ai o le tai, o lea ua maea foi ona aumai manaoga, faafetai atu ai i le Minisita mo Galuega, ua tali fiafia le savali o si matou itumalo, o lea ua tapuai mai toaiina i ou faiva ia manuia.

A o le Minisita mo le Soifua Maloloina, faamolemole lau Afioga, o le tatou falemai lea i Lufilufi, na amata mai lava i Tiavea, Fagaloa-uta i le mea foi sa e afio muamua ai se i tau mai i Luatuanuu, o le tele lena o le vaega o lo o tu ai le falemai lea a tatou i Lufilufi. O le taimi nei, na o le tatalo faavavevave, pe maua sina tagata foi lea e 24 itula e nofonofa ai, na o se tali lava o nai manaoga, pau lava lea o se...e tatou te iloa o lea e i ai fuafuaga faataatitia a lo tatou Malo mo le toe faaleleia o le nofoaga aua ua tele le mea o lo o kava e le tatou falemai. Ae faamolemole lau Afioga, na o le tatalo atu, na o se tagata e faapena ona sulufai atu i ai, aemaise taimi i le tuneva o le po. Ma le agaga faaaloalo.

O le matou tala lea, ia agalelei mai le Atua i le faamoemoe o lau Afioga i le Fofoga Fetalai aemaise o lenei Maota, ia tatou faatalitali pea i le faamanuiaga ma le faauuga a le Atua e tauave ai o tatou tiute ma o tatou faiva. O lea foi na taua e nisi, e na o le tou tulai mai lava ma faafetai mai i le Minisita mo Aoga ma lenei Matagaluega, a o le tausaga na tea nei, ua outou otegia mai le Minisita ma lenei Matagaluega. A o lea ua outou faafetai mai, o le faailoga lea o lo o fai foi se galuega a lenei Matagaluega aua le auaunaga mo le tatou atunuu aua le tautuaina o outou, aemaise lava o tatou alo ma fanau, o le lumanai lea o Samoa. O le mea foi lea, ia o le tele foi lava o taimi tou te vaavaai mai o ou fealualuai i tua i le tou faaitu lea, ia o lena ou te faigaluega mai i ina, e faapena ona fai mai fesootaiga i mea e tataua ona fai.

Ia agalelei mai le Atua i lenei afiafi. Ia manuia lau Afioga i le Fofoga Fetalai, o lea ou te vaai ia te oe, e te le o gasegase o lena e te malosi, o lena e maualuga lou soifua. Ia manuia foi lau Afioga i le Palemia, Kapeneta aemaise ia Minisita Lagolago, faapea lea itu o le Maota, i le suafa o Iesu, amene ma amene.

FOFOGA FETALAI: Malo. Ua faafetai saunoa faafetai foi malele i le sui usufono mamalu mo Anoamaa Sasae, ia ua uma lau saunoaga ae le uma le fia faalogologo, malo faafetai i le tofamamao i le aanoa o le saunoaga, ia amuia foi lou itumalo o lo o faafofoga tapuai mai i le saunoaga.

E maitau atu ua tulai mai le sui usufono mo Faasaleleaga Nu.1 i Sisifo, le tamaitai sui usufono o le Taitaifono foi o se tasi foi o Komiti, le sui usufono mamalu mo Faasaleleaga Nu.1 i Sisifo.

Afioga Hon GATOLOAIFAANA AMATAGA ALESANA-GIDLOW (Faasaleleaga Nu.1 Sisifo): Faafetai tele i lau Afioga i le Fofoga Fetalai mo le avanoa o lenei itumalo e fai ai foi sina tala, ia po o se sao foi aua le Tala Faaopoopo o le Tupe ua i lumamea nei.

Ae muamua lava ona ou fia faatalofa atu, e faatulou atu foi i le paia o lenei Palemene i le afio o lau Afioga i le Fofoga Fetalai, tainane foi le afio o le Afioga i le Palemia, le Sui Palemia, afifio o Minisita i tamaitai Minisita ma alii Minisita, afio foi ia Minisita Lagolago, ia faapena foi ona afifio atu ia lenei foi itu, e moni lava pei a taumavaevae a tatou mea, ia ae leai o tatou lava e tasi. O sui usufono mamalu o le Palemene, afifio foi Faauluuluga o Matagaluega ma Faalapotopotoga a lo tatou Malo o lo o vae ma lima i ai galuega a le Malo, ae tainane foi le Failautusi ma le mamalu o le aufaigaluega i totonu o le tatou Palemene nei.

O lo o faafofoga foi le Afioga i le Faamasino Sili ma le aiga Faamasino, ae tainane le faafofogaaga a Lana Afioga Mamalu, O Le Ao o le Malo, Sui o le

Fono a Sui Tofia le paia lasilasi o Samoa. E talitonu o le a taatia au upu, o ou mamalu lava e mai le vavau seia oo lava i le faavavau. E le suia i se upu po o se tala, ne i le atoatoa se faamatalaga a le sui usufono o Faasaleleaga Nu.1 i Sisifo, ona avea lea ma lape o le afiafi.

Ae ou te faatalofa ma ou faatulou ma avatu foi moomooga o lenei tausaga fou i le tatou Palemene. Lau Afioga i le Fofoga Fetalai, ua ou vaavaai i le tatou Tala o le Tupe Faaopoopo, ma ou te iloaina sa i ai le faaupuga e leai se Tala o le tatou Tupe Faaopoopo. Ae ou te faatuatua lau Afioga i le Fofoga Fetalai i le Afioga i le Minisita ona o le tama o le Faasalele, o le tama foi e le fefe, a silafia lava le mea e tatau ona fai, ona faapea lea ona i ai le agaga toa e fai ai. Ou te avatu le agaga faafetai i lau Afioga i le Minisita ma le Matagaluega, e ui lava ina utiuti a tatou seleni, ae o lo o taumafai pea e tali le mana, tali manaoga o le tatou Palemene nei, o manaoga foi na o lo tatou atunuu. Pau lava sina au tuualalo, e ui lava ua tavaevae si o ta itumalo, ia aua e te faatalale atu isi ou uso o Faasaleleaga Nu.1 i Sisifo lau Afioga Tuioti.

Ua taatia foi lau Afioga i le Fofoga Fetalai talosaga a lenei itumalo, pei ona fai atu se faamatalaga o lo o utiuti seleni a lo tatou Malo ae taumafai pea e tali mai. Ua taatitia ia talosaga aua auala galue o lo o matou itumalo ua fai foi sina leva e le i oo atu i ai se fesoasoani aua lava galuega tau atiae ma lagolago mai a tatou itumalo i tulaga tau atinae o le tamaoiga. E faapea foi ona taatia nisi o talosaga e tusa ai ma apitagalu e fesoasoani ai i lenei foi vaiata i le suiga o le tau e le o faigofie le siisii o le tai, ma o le a le toe oo i ai se faamatalaga, ou te lagona o lena ua nofo silafia foi e Afioga i Minisita manaoga o lenei itumalo.

E pau lava nai mea e fia faaopoopo lau Afioga e toe tuu atu pea se talosaga e tusa ai ma le auala sima i le va o Lalomalava ma Sapapalii, ona o se tulaga o lo o lamatia ai pea le soifua pe a oo i taimi ua le mafai ona ausia e taavale ona o lologa po o tafega foi, e tai alu lava se aso atoa i nisi taimi, a tetele lava timuga, ua faapena ona taofia ia auala ona sopoia, ae a oo loa i taimi o mai tigaina ma faalavelave tutupu faafuasei e manaomia ai se fesoasoani i le tatou falemai i Tuasivi, ia ua le mafai ona faatino lea faamoemoe. O se talosaga ua leva ona taatia atu ae toe faamanatu atu pea faamolemole.

O sina tuualalo lau Afioga i le Minisita o le LTA, ona talu ai o lea ua tatou molimauina ma e lagona foi o se tulaga lelei, ma e ua molimauina ai le lelei o atinae o le tatou atunuu i tulaga ia ua faatupulaia taavale, ua mafai lava ona saoloto le tagata i le mea e agai i ai ma faatino atinae. Ae pau lava o lea e lagona e tatau pea ona i ai nai puipuiga i e o lo o aveina foi taavale, aua o le tele o taavale ua i ai nei, o taavale foi nei sui kia e otomeki, na o le tuu atu lava i luga i le drive alu i le atoa, aua pei e feoloolo taimi ia a o sui kia, e taugesegese ai ma tau le o ai i so o se isi i luga o auala, ua oo lava i taimi ua maitau ua o lava i luga o auala. A o se fautuaga lea lau Afioga i le Minisita, se i tagai lava i le faatinoina o laisene, pe le i tatau lava tapena aoaoga foi a e o le a faaogaina o tatou auala, ina ia aua ai ne i lamatia le soifua o e o lo o femalagaai i luga o auala. O le isi foi tulaga lau Afioga lava lea o lo o e Minisita i vaa, e avatu pea leaga o se atugaluga foi i le aumalaga mai Savaii ma toe foi atu, i le tulaga lea ua sii ae ai le \$29 i luga o lata booking pe a faapea ae le faaogaina. Pe le mafai lava ona toe faasafua lea vaega ona e i ai lava taimi e le maalofia lava le suiga o le taimi ta te malaga ai, ia ae paga lava lea ua faasala lava masalo foi lava o ni fuafuaga i lo tatou ofisa, ae se i tagai ane pe leai lava sina fesoasoani mo matou nei mai Savaii.

Lau Afioga i le Fofoga Fetalai, pei o se faamatalaga na fai atu o lo o nofo lava ma le iloa e utiuti seleni a lo tatou Malo, ae o lo o taumafai pea e tali mai. O mea foi la lea o nai mea laiti na ua tuuina atu, e le uma lava le agaga tatalo pea aua ia ni galuega foi mo nai o matou tagata i Savaii ina ia aua ai pei foi ona taua e nisi o sui usufono mai Savaii ni auala e mafai ai ona taofiofia ia tagata Savaii i le feoai atu ma le feoai mai, e sefesepe ai foi o latou tamaoai, e le gata i lea o le mafuta ai pea ma aiga.

Ae i lenei itula lau Afioga i le Fofoga Fetalai ou te fia pai atu lava i lou itumalo, e faatalofa atu i ai i lenei foi tausaga fou, o le tausaga fou ua tatou aulia ma le manuia i le alofa ma le agalelei o le Atua. Ma ou te fia faatalofa atu ai i le afio o lau afioga i le Tupunatausi susuga Sua, o le Taumaupu, aemaise foi Tusani ma le aiga sa Tusani ma le mamalu ia oe sa Silafaiga. Afifio foi le paia o le aiga Salevalasi, afio le Tootooalii ma le Matua ia Asomua lau fetalai Leauaanae ma le nofo a ituaiga ia te oe Sasulu. Le paia i Alo o Tagaloa le Aitutagata ma le Fofoga Fetalai faapea le mamalu ia Safune ma Taulauniu. Le paia i le Tamaitai, le afioga ia Gatoloaifaana ma le Falefa o Itulagi. Susu foi Taito ma Usoalii ma lo latou Matua ia Tanuvasamanaia. Afio le Alo o Tamalelagi ma le Matuainafa ia Tia ma Tuioti. Afio le Gafa ia Soanai ma Patane, ae tainane le susu o le susuga ia Tuilaepa o le Usoalii o Malietoa, upu ia oe Safuamua ma le nofo a ituaiga. Alaalatai le Tapaafanua ma le Faleono, ia ma le mamalu i le Salemuliaga ia Fuga ma Mauga.

E avea foi lenei itula ou te molimoli atu ai le agaga faamafanafana, ona o le gauia ai o le tootoo o se tasi sa avea ma poutu i totonu o lo o tatou nuu, afioaga o Aiga ma le Faletolu le tofa ia Afoa Ite, o se tasi sa faalagolago i ai le tausiga o le nuu, tausiga o le ekalesia. Ia faamafanafana le Atua i le tasi ia Pesi aemaise foi o le susuga i le faafeagaiga ma le faletua, e faapea lava lo tatou olaga, e pule le Atua o Ia e aumai, o Ia na toesea, ae ia maua lona mafanafana aua le faaauuina foi o galuega sa faafeagai ma lea foi tama po o lea tootoo o lo tatou nuu.

Lau Afioga i le Fofoga Fetalai e fia faauma atu sau tala i se upu e faamalosiua e faalaeia. Lau Afioga i le Taitai o le Malo ma lou Auvaa, le Afioga i le Tamaitai Sui Palemia, Afioga i Minisita. E amuia foi outou, aua e moni lava le upu, e tele e tofia ae laiti lava e filifilia. E le faigofie foi le faafeagai ai ma faitioga ma faaleaga, ona o le a? O le faiga o le faiva, faiga o le tofiga o le auunaga. O lea ou te faapea atu ai, ia maua le agaga mai le Atua tou te faafeagai ai ma o outou tiute i lenei tausaga o le a tatou savalia foi, o le a feoloolo foi faitioga i lenei tausaga ua tuana'i i faitioga o le a sau i lenei tausaga. Ae ui i lea, ia outou maua le tofa ma le toafilemu mai le Atua. Ou te lagona ua i ai, aua e faaaupegaina e le Atua Ona tagata Na te filifilia, ae ia maua pea le onosai. E faapea foi le upu faamalosiua lau Afioga i le Fofoga Fetalai, e maitau atu e le o faigofie aua ua lavea le soifua maloloina i le faatinoina o galuega, faatinoina o tiute, a o le Atua lava pulepuletetele o lo o ia Ia le tofiga e ia Ia foi le malosi i le tino ma le mafaufau, e faatino ai Lona finagalo ae le o le loto o le tagata. Ia alofa foi le Atua i le afifio atu o Afioga nei, sui usufono mamalu o le Palemene ia maua le faautaga, ia maua le tofa, i le faafeagai ai foi ma la matou foi matafai o le iloiloina o Tulafono ma toe tuu mai ai i luma o le tatou Palemene, ia faapea ona maua le faautaga ma le faatofalaga mai le Atua e faatino ai foi a matou galuega.

I le affio ai o Faauluuluga o Matagaluega ma Faalapotopotoga o Matagaluega a le Malo, o outou mama na, o outou o lo o tua i ai lo tatou Malo, fai ou faiva ma le faamaoni ma le lototele ma le onosai.

Lau Afioga i le Failautusi ma le tatou aufaigaluega a le Palemene, ia faapea ona maua lo outou tomai ma le silafia aua le faatinoia o la outou galuega.

Ia o se faamatalaga lea lau Afioga i le Fofoga Fetalai, e avatu ai se upu e faamalosiua faalaeiau ae ua tatou savalia ai lenei tausaga, ia alofa le Atua ia faamanuia mai i le tatou Palemene, soifua.

FOFOGA FETALAI: Malo faafetai. Malo malele i lau Afioga i le Tamaitai sui usufono ia po o le Taitaifono foi o se tasi foi o Komiti Faa-Palemene. Malo le saunoa aua manaoga o le itumalo, aemaise foi o le taulagalaga i nisi o mataupu taua e ao ona fai i ai lo tatou sao e ala i fautuaga i le paia o le Malo ae a le Palemia, le Sui Palemia ma le Kapeneta. O lea foi ua e malele ma saunoa faalaeiau e faalototele i faafitauli, malo faafetai o lo tatou faiva alofilima lena ina ia tatou faalaeiau ma faalototele ia i latou o lo o faapena ona feagai ma le faasoasoina o atinae eseese o le atunuu mo le manuia o Samoa ma ona tagata. Malo faafetai e le laeii i se upu.

Ma ua avanoa foi lenei taimi i se isi sui usufono e tulai mai e saunoa ai e tusa ai o le tatou Tala Faaopopo o le Tupe. O lea ua tulai mai le sui usufono mo Anoamaa Sisifo i le fetalaiga i le Matua ia Lauofo, o se tasi o sui usufono sinia o le Maota.

Tofa Hon LAUOFO FONOTOE NUAFESILI PIERRE LAUOFO: E momoli atu le faafetai i lau Afioga i le Fofoga Fetalai, faamalo le faapalepale ua aulia mai ai lenei itula o le afiafi mo le faaauauina o le tatou galuega. E momoli atu foi moomooga lelei ma faamanuiaga o lenei tausaga fou i lau Afioga faapea foi sui usufono mamalu uma o le Maota, aufaigaluega uma a le Malo, aemaise le tapuaiga a Samoa o lo o faafofoga mai faapea foi Ekalesia eseese foi o lo o tapuaia o tatou faiva.

E manatu o lele ua faaifo i Atimalie nisi o saunoaga o le aso, e momoli atu ai foi le faamalo i sui usufono mamalu sa faapena ona sausaunoa. Ua ou tulai atu foi e fia folasia nai motugaafa e fesoasoani atu i le Malo pe aoga i le afaafaina ma le faufauina o lo tatou sa, aua o lea o le a amatalia foi folauga o lenei foi tausaga 2018. E taua foi ni faitioga lau Afioga i le Fofoga Fetalai, e taua e faatupu manatu, e taua e fagufagu, e taua e toe faamanatu mai ia i tatou, e taua e faatonutonufolau ai foi la tatou folauga, ona e taua o tatou tiute, e taua o tatou tiute i le tauaveina o le mau, o le feau ma le galuega, e taua le puipuiina o le tatou tofi, o le tofi sa saili e nai o outou tuua ma nai o matou foi matua. Ma o latou moomooga ina ia aua ne i valetuulima le tofi, ina ia aoga ma ia maua se manuia o Samoa agai i luma.

Sa sau foi lou sui usufono ma nai fesili i lou mafaufau i nai isi mataupu e pei ona sausaunoa i ai nisi o sui usufono. Ae momoli atu le faamalo i nisi o Minisita i le faamalalamalaina o nisi o mataupu o lea foi ua malamalama lou sui usufono. Sa i ai foi nai mataupu sa fia malamalama ai i le tatou galuega po o le poloketi lea o le Toese i Tanumalala. Ia o lea ua maua nisi o vaega, o lo o faasolosolo foi lea vaega le fauina o le tatou galuega lea, e fuafua i seleni, o se tofa foi ua tuutuu mamao, e momoli atu ai le faamalo ma le faafetai. O lo o i ai nai vaega o lo o totoe, o lea ua maua i le faalogo, ia e fai foi ia Tauofoga i na vaega pe a oo atu i ai.

O lea ua oo atu pe a ma le \$10milion le tupe lea ua faaalu po o lea ua commit e le Malo i le faagaioiina o le poloketi lea. O lea foi ua faamauina le tauaofai e \$20milion, ua saunoa foi le Afioga i le Minisita o Tupe, e leai se variation o i ai. I lau la faalogo ma lau maitau, ia o lo o solosolo lelei le galuega. Ia a o nai a matou foi motugaafa, o le upu lava e masani ai le atunuu lau Afioga i le Fofoga Fetalai, e le aoaia e le Matapia le Manaia, o ma e le taofia foi lo matou tiute o le taulogologo. Ua ou vaavaai foi i le ata o le galuega, e manaia foi le galuega, e manaia le ata. A o lau fautuaga i lau Afioga i le Minisita o Tupe ma le Minisita o le Falepuipui, afai e manaomia e talafeagai ma tatau ona fai ni variation, fai, o lea ua amata le galuega, o lea ua commit le Malo, fai ia maeaea fai ia mautu, fai ia atoatoa. O le galuega e tupe e alu ai. E leai se aoga e fai ai ae fai afaafa, pe fai le atoatoa. A o le fautuaga lena lau Afioga, o lea e maua o le tatou Toese lea e i Tafaigata, ia ua fai lava sina vaapiapi ae ua toatele pagota o lo o nofosala, ia ua talafeagai foi lenei vaitau ua tatou i ai ma le galuega lea ua faatino. Atonu e le fou foi le faatalanoaina o lenei galuega, o lea ou te iloaina sa faatalanoaina foi i le vaitaimi o tulai mai foi lau Afioga i le Fofoga Fetalai i le Minisita mo Leoleo ma Falepuipui, ae faafetai i le Atua i lenei vaitau, ua maua tupe e faatino ai. O lea la ua tatou agai i lea foi laasaga. O le matou la vaavaai i le galuega, ua matagofie i lona amataina. O lea foi sa faalogologo atu i le aso ananafi i le saunoaga a le Afioga i le Minisita o le Falepuipui, le faalau mai o galuega ia o lo o totoe e faatino i isi phases po o isi vaega ia e mulimuli mai tua, na taua ai le fauina o le Administration Block, ia o le fale foi lea e taumamafa ai ia pagota, o le fale e kuka ai ia taumafa pe gasese ia meaai, ia faapea foi nisi potu pei ni sela. Lau Afioga i le Minisita, o lau fautuaga, fau ni potu ona o lea ou te vaai atu i le lisi lea e aumai e le o aofia ai ni potu e fai ai ni aoaoga a pagota. O le manaia ia o le manulauti o le Toese lea na ou pue atu ananafi i le saunoaga a le Palemia, o le Nofoaga mo le Ola Toefuataina. Afai o le manulauti lea o le tatou Toese, selau pasene, ae faatino la faapefea? E le mafai ona tatou o i se faiga foi lele na ona ave o pagota loka, uma ona tuli le taimi o le faasalaga toe tatala mai i tua. E tatau ona i ai se fua lelei e fua mai i le taimi o i totonu o le Toese. O le mafuaaga lea o fautuaga ia e avatu fai aoaoga ma polokalame a pagota, aoaoga faa-Tusi Paia, toe tapue ai le ola faaleagaga. Vaai nisi avanoa po o nisi fale e faatino ai ni galuega e aoaoina ai nisi matata ina ia ausia le manulauti lea o le ola toefuataina, a oo i le taimi e uma ai ona tuli le faasalaga, foi mai i tua i aiga ae ua i ai se aoga, ua i ai se mea aoga e aoga i le aiga, e tautua ai le aiga. Ua aoga i le nuu ma le afioaga e tautua afioaga, tautua foi ekalesia. E tatau lava ona ausia le manulauti lea, manaia tele i lau faalogo. Ua tatau ona tatou agai i tulaga faapena, aua la i le taimi e omai ai i tua ua uma le faasalaga, e mafai ona toe reintegrate into the community ma ola i se olaga aoga i totonu o le afioaga ma le aiga. O le mafuaaga lea o lou fautua atu i tulaga ia, fai ina ia mautu ma atoatoa le tatou galuega lea.

Sa i ai sina ou popolega ina ua amata le poloketi lea. Sa fesili lou mafaufau, o lea o le a fau le isi Toese tele atu. O lona uiga, e foliga mai o le a toe faaopoopo foi isi tupe e ave e tausi ai ma faagaioi ai le Toese lea, faaopoopo nisi expenditure a le Malo. Ae ou faalogo atu ananafi i le saunoaga a le Minisita o le Falepuipui, o le manaia ia o le upu lea na ou pueina atu, ina ua saunoa e faamalalalama le Toese i Vaiata, na ia taua ai le upu lea o le commercial farming. Ia e tasi lea tulaga e tatau foi ona toe aoaoina lelei i

totonu o le Toese, aua o lenei foi vaitau, ua i ai foi nisi faiga fou e faatino ai le faiga o faatoaga. A lelei ona fai faatoaga ia, aua o lea sa saunoa lau Afioga ananafi, e tele talo e mafai ona faatau atu, e tasi lea tupe maua a le tatou Toese, aua o la e ua i ai le workforce, ae vaai faalelei le faatinoga o faatoaga, tupe maua, ina ia lelei ona faaoga. O le mea lea e agai atu ai lau tautalaga i i, ina ia self sustain le tatou Toese. A lelei la ona faatino le mea lea sa e saunoa i ai i le commercial farming, e le tele foi se tupe a le Malo o le a toe alu ai i le tatou Toese lea.

E pei o manatu ia lau Afioga, afai o lenei ua i ai fuafuaga a lau Afioga ma le Malo i le tulaga lenei, e matua selau pasene, e lagolagoina e lou foi nei sui usufono. O vaega ia sa ou fia talatalanoa i ai lau Afioga i le Fofoga Fetalai, aua ina ne i o tatou agai tele i mea o le fausiaina o fale, ma tele le faamamafa i i ma faitioga ma tau o le fale ma na mea uma, ae galo ai latou o le a nonofo i totonu o le nofoaga tuai e tatau ona i ai se aoga. O le faapuupuuga o lea vaega lau Afioga i le Fofoga Fetalai, e taua le fale i lou taofi, ae o lou manatu, e sili atu ona taua le anofale. Ia amanaia ma tautuana i latou o lo o faapena ona tuli o latou faasalaga ia omai i tua ua i ai se aoga o le latou nofosala ai.

Lau Afioga i le Fofoga Fetalai, faafetai o lea foi ua maua i le saunoaga a le Minisita o le a faapena foi ona saunia housing quarters po o fale foi nei e nonofo ai le aufaigaluega ona e tele sifi, e tolu sifi pe a, tuu i ai ma se fale foi lele e koloni ai le aufaigaluega ina ia malolosi tino ma ia talafeagai lelei lo latou malosi aua le faatinoina o latou tiute.

O le agaga fiafia ma le agaga faagaetia e le mafai ona tuua i lalo i le tatou vaalele fou. Malo faafetai, o au foi le isi sui usufono sa lagolagoina tele lea foi atinae a le Malo, aumai se tatou vaalele. E taua le vaalele, e tele mea e taua ai atonu e le tau faaleoa foi, e aoga ma taua i tatou turisi, e aoga mo le tatou tamaoaga. Na pau lea o nai vaega lau Afioga i le Minisita i le vaitaimi foi lele o le kerisimasi, sa tau saili atu nai avanoa, ae pei e le i function lelei le tatou online system foi lea e fai ai bookings. Se i toe silasila aua tasi lea vaega taua tele i pisinisi i nei ona po o le mea o le tekonolosi lea ua faaoga e faatau ai tickets e feoi ai i luga o vaalele, ina ia operate ma function lelei uma na vaega, aua e le faigofie. E pei foi ona saunoa nisi o sui usufono, e le faigofie le industry lea e fai lava foi si competitive tele. E taua foi le finagalo ua faaalua ma ou te auai foi, afai lava e solosolo lelei le tatou vaalele, e tatau lava ona i ai se vaalele e lua ai tatou vaalele, ae o lea foi ou te iloa e tatau foi ona tatou faaeteete i mea faapea, aua foi le tatou soona televave. A o le fautuaga lava ia, afai foi ua silasila i ai le Matagaluega ma lau Afioga i le Minisita, a ua talafeagai, ua oo mai se taimi talafeagai, e tatau lava ona lua ni tatou vaalele, aua e le faigofie le tasi o le vaalele, aua a oo foi i le taimi e fai ai le siaki o le vaalele, aua e faatauaina foi le saogalemu, e faapea foi taimi ina ne i te i ua i ai se mea e faaletonu ai le vaa, a o la e i ai le isi vaa o la e vaavaalua ma le tatou vaa ina ia mafai ona galulue faapaaga ma nisi foi kamupani. E faapea le fesoasoani e mafai ai ona sologa lelei uma le faagaioioiga o le pisinisi.

Ia ma le isi mea lau Afioga i le Minisita, ia tautuana aua e tele lava malaga a le tatou Malo, ia se i faaoga le tatou vaa. O le isi lea aoga ma le taua o le tatou vaa e faaoga e tatou tagatanuu ae faapea foi le aufaigaluega a le tatou Malo pe a femalagaai i fonotaga i atunuu e mamao. A o le fesili i lea vaega lau Afioga i le Minisita, e fia maua lava po o le a le tulaga o le tatou lisi o le vaalele, po o le tulaga lea e i ai e totogi masina pe totogi tausaga ae pe fia se

lisi o lea e totogi i le masina pe a faapea o lea e totogi i le masina ona o lea foi e fesilisili tagata e fia malamalama foi i lea vaega. E pei o le fesili lena.

Lau Afioga i le Fofoga Fetalai, e le toe faaumiumia so matou foi manatu, e i ai le mea lea e maitauina, e i ai le tulaga foi lele o tagata... ua tele lava foi tagata o tatou lea e i ai le tulaga foi lele pei e faamoemoe i mea nei o fualaau, e faaoga foi lea e tatou ua gasegase aemaise faamai ia le pipisi. E pei ua i ai se faamoemoega i fualaau. O lona uiga pei ua agai foi lele i se mindset e agai i mea nei o togafitiga, treatment. Ae pei ua le maua le mindset lea o le prevention, e pei e tataua ona ave i ai le faamuamua, aua o le mea lea e i ai ua soona tausami i luga o le mafaufauga foi lele e aua le popole o la e i ai fualaau a gasegase, na ona tago atu lava aumai le fualaau o le mai suka, o le fualaau o le toto maua luga a o la e maua, ae tataua ona tatou faataua le prevention. O le mea muamua ma le laasaga muamua lena.

O le talosaga i lau Afioga i le Minisita mo le Soifua Maloloina, tatou Community Based Health Programme, afai e maua ni nai teine foi nei tausisoifua, aua masalo a talosaga atu nei ni fomai, ou te iloa e le lava fomai, masalo ai o maua nai teine po o tamaitai tausisoifua e galulue faatasi ma sui tamaitai o afioaga e asiasi i maota ma laoa e toe uunaia le tulaga foi lea o le tatou primary health care aemaise o fanau iti ma pepe e fananau mai. O lea foi sa saunoa se tasi o tootoo e toe lalaga mai mea nei o komiti tumama. Ia o se tasi foi lena vaega e galulue faatasi ma tamaitai tausisoifua aua la totonu o afioaga ina ia faapena ona asiasi atu i totonu o maota ma laoa o le afioaga i nai aso o le vaiaso, o i ina o le a maua ai mea o a tonu ituaiga gasegase ua aafia ai afioaga i totonu o le atunuu.

O le upu faaii i le tatou Health Sector lau Afioga i le Minisita Lagolago, o le a se tulaga o le tatou Public po o le National Public Screening foi lea o le kanesa? O i ai se polokalame o faataamilo i le atunuu? O lea ou te faalogo i le leitio i mea o faasalalauga ma faalauiloga a o le mea foi lele o le faata pe i ai se mobile unit e mafai ona faataamilo i le atunuu, aemaise lava le kanesa lea e aafia ai nai tamaitai, lea e maua foi lea i le faalogo ma e toatele foi nisi o talatalanoa i ai ma talatalanoa mai, pe i ai se fesoasoani faapena ae pe i ai se tatou polokalame. O lea ou te iloa e i ai le tatou polokalame foi lea siaki, ae ia manatua o le toatele o isi e le oo mai i le tatou falemai i totonu o Upolu nei faapea foi ma Savaii.

Lau Afioga i le Fofoga Fetalai, masalo o le a faaii atu ia sa matou upu i le itumalo, e momoli atu ai le faafetai i le itumalo i le latou tapuaiga faafetai foi tatalo o lo o manuia ai lava mea uma. A o le talosaga lau Afioga i Minisita, masalo o lena ua silafia talosaga tusitusia o lena ua i outou ofisa, i le matou auala lea pei foi ona talosaga atu ai i Sauniatu. E taatia atu ma lafo atu i sau fuafuaga i ai lau Afioga, aua e pei lava foi ona talatalanoa atu, o lea foi sa i ai le ioega a le Malo o le a faatino a ua ese foi le tulaga ua i ai le fuafuaga ua le mafai ona faataunuu i lena tausaga ua tuanai atu, ae o lo o tatalo pea ma tapuai atu ou faiva. O taligalu, o lea lava o lo o talosaga pea nei mea o taligalu lau Afioga i le Minisita, e le gata i auala o le Malo i le puipuia o auala o le Malo, ae faapea foi tulaga tau siosiomaga, e i ai nai taligalu o matou afioaga ia o Eva, Salelesi ma Fusi. Na saunoa foi lou uso a sui usufono mai Anoamaa Sasae i matou aualatele ia e agai atu i tua ma agai atu lava i tua i le mata Aleipata, ia e tele lava le faaletonu o lo o i ai, atonu a asiasi atu foi lau Afioga, ona e talitonu lea ma mataitu ia tulaga pei ona tulai mai, a o lea lava e malamalama. O le vaitaimi lena o le louloua o le tau, o lo o feagai i

tatou ma timuga, ae malamalama foi e faigata le galuega o lo o feagai ma lau Afioga, ia, ae tata logo atu pea ma faamanatu atu pea nai galuega na.

Lau Afioga i le Fofoga Fetalai, ia agalelei le Atua i lou soifua. O lea lava ou te vaai atu o lena e te malosi, malo. Ia agalelei foi le Atua i sui usufono mamalu uma o le Fono ia maua pea lo outou soifua laulelei. I lenei foi tausaga fou ua tatou savalia, ia agalelei le Atua. Le aufaigaluega a le Malo, malo tautua, malo le galulue. Ia, le tapuaiga a Samoa, ia folau i lagima. Ia manuia le Fono.

FOFOGA FETALAI: Malo, ua malo fetalai ua malo foi saunoa i se tasi o sui usufono sinia o le Maota. Ua faafofoga foi Samoa i le manino ma le malamalama o le folasaga a lau Afioga, malo faafetai ua faaiuina ma le manuia le saunoaga, ua faafofoga foi lou itumalo aemaise foi o le paia o le Palemene. Ma ua faapena ona avanoa foi le tatou Fono mo se isi sui usufono e tulai mai e saunoa, o lea ua faasolo ina maea le tele o sui usufono. Ia, o lea ua tulai mai se tasi o sui usufono sinia o lea itu o le Maota, le sui usufono mo Palauli le Falefa.

Afioga Hon FAUMUINA TIATIA FAAOLATANE LIUGA: Faafetai i lau Afioga mo le avanoa. Faafetai i lou lavapapale i le faafoeina o le Fonotaga a le Fono Aoa o Samoa. E muamua ona ou faafetai atu i le Afioga i le Palemia ma le Sui Palemia ma le Kapeneta aemaise foi lena itu. O lea foi e afifio atu tama o itumalo po o tama foi o le atunuu pei foi o lena itu. O le tatou Fonousu faa-Palemene, faafetai atu mo lenei avanoa ua maua e toe tuu atu ai se tuualalo po o se fautuaga, po o faitioga foi e faafoefoe ai galuega o lo o tatou taufai galulue ai, mo se manuia mo Samoa.

E muamua ona avatu le faafetai tele, i le Kapeneta, lau Afioga i le Palemia ma le Kapeneta i galuega fai o lena tausaga ia ma lenei foi Paeaiga, lea ua tatou faasolo atu i le 2 tausaga talu ona tatou papale mai i lenei Paeaiga.

Faafetai mo galuega lelei, faafetai mo lo outou galulue punouai, ia o le tala lava a le Tusi, o le tagata lava e naunau ina ia maua le mea lelei, e saili i le loloto o le moana le taimane e sili ona taugata, ia po o le auro foi e sili ona lelei, i le loloto manava o le eleele.

Faafetai i atinae ua faia, aemaise foi le malae vaalele, ia o galuega o lo o faagasolo e pei o mea o lo o tele a tatou tupe o lo o faaalu ai, ia faamalo, o le galueina o tatou nuu i tua, o le tatou faamoemoe. E a foi, e pei e muamua ona ou avatu galuega ua uma ona ou taua foi i lau lauga i se tasi o tatou fonu i lea tausaga, e ui lava ua pasia lou auala galue mo Sili i le Tenders Board, ae le i faia lava. Papalii e le i faia lava le auala galue lea, o oe lava na e saunoa mai ina ua ta talanoa, lauga ai, o lea la ua tolu au lauga, ae leai lava se mea ua faia, ia e le afaina o lea e te tuatuagia e fai isi galuega e sili ona taua ia te oe, ia ae e te iloa lau tala na fai ia Manualesagalala, a e le faia lou auala galue lea, ou te le faia ai. O lea la ua ou toe tau atu ia oe, a e le faia lou auala lea, ou te le faia ai.

O le mea lava e sili ai ona ou faanoanoa, o le tausaga faaletupe lea na pasia ai lou auala, e \$61.9milion le tupe e le i faaogaina. Se i vaai i le tele o le tupe, ae o lea lava e taia i ou taliga a outou saunoaga ma saunoaga a sui usufono, fai mai e leai ni tupe. O lea la o le a ou tau atua mea la e i ai ia tupe. O le matua tele o le faaletonu, vaai i le tele ma le anoanoai o tupe a o auala o lo o faatino ai a tatou atinae, e matua vaivai lava, ma o lea o le ou tau atua ia

solutions, ae se i tau muamua atu atinae a lou itumalo, ia na faaita atu ai lea o oe.

Susuga Hon Papaliitele Niko Lee Hang: Lau Afioga i le Fofoga Fetalai....

FOFOGA FETALAI: Ia tulai mai le Afioga i le Minisita....

Susuga Hon Papaliitele Niko Lee Hang: E le faalavelave le saunoaga matagofie a le sui usufono mamalu. O le auala lea e saunoa ai le Afioga i le sui usufono mamalu, ia ai na pasia e le Tenders Board i le Paeaiga lea sa i ai ia lana Afioga. Ou te le o malamalama la i ai, aua o galuega ia e faatino i lou taimi, o galuega fou uma. Ia ae se i toe asia lau galuega, po o fea o faalafi ai e Manua lau... aua o taimi o Manua lea ou te malamalama sa pasia ai lau galuega. Ia ae tatou onosai pea o lea e faasolo atu lava le galuega, ma le faaaloalo lava.

Afioga Hon FAUMUINA TIATIA FAAOLATANE LIUGA: Faafetai, so o se Minisita lava e mataala, e alu atu vaavaai i records o galuega la e faagasolo. A o le Minisita lava e le mataala, e alu atu fai faapito mea e manao lava ia e fai.

Susuga Hon Papaliitele Niko Lee Hang: Lau Afioga i le Fofoga Fetalai, e fia faasao le saunoaga a le sui usufono mamalu. E oo atu lou taimi i le Ofisa o le Minisita talu ai, ua leai ma ni mea o i ai, ou te le o iloa la po o fea o le a ou alu ai e sue mai nei mea e te saunoa ai. A pei ona ou fai atu, taatia mai lou fanoga, o lea e faasolo atu lava le galuega. Ia ma le isi mea lau Afioga, masalo o lau Afioga o le tele o auala ua uma ona faatino e le tatou Malo. Ia ae o lea o le a sauni atu ia masalo o le tausaga mulimuli o le tatou Paeaiga, ua oo atu loa le faasologa i lau Afioga.

Afioga Hon FAUMUINA TIATIA FAAOLATANE LIUGA: O le faalavelave o le tausaga mulimuli e te le oo i ai, e te uma e te le i taitai. Ae faafetai atu i lou finagalo faaalua, e leai ni auala galue se tele na faia mo lou itumalo e na o le lua auala na fai, e leai la se isi auala na faia na pau lava lona, ae luasefulu tausaga lea e fai ai auala galue ia e lua, lona uiga e sefulu tausaga e fai ai le auala galue e tasi. O lea la ua toe foi atu le isi auala, ae lea lava e le i faia, ma le faaaloalo lava. Ae ana faapea la e tuu le auala lea e alu i lou falesa oulua ma Faasoo, ae fai ai lou auala, ia ua manaia, a o le faalavelave, ua fai le auala o lua falesa, ae tuu auala galue, o le faalavelave lea.

Susuga Hon Papaliitele Niko Lee Hang: Lau Afioga, e le o sau falesa, falesa a le Atua. A o le auala foi, o le auala o le taulaga, auala o le Malo o la e taufaalelei auala ia. Ia pei o le faasaoga lea, e le o sau falesa faamolemole.

Afioga Hon FAUMUINA TIATIA FAAOLATANE LIUGA: So o se mea lava e i ai se auala e le i faia, o le na e te silafia le Tulafono e faatupe pe totogi e tagata e ona fanua ia le fausiaina o le aualatele, ona faatoa tuuina lea i le Malo mo le tausaina faaauau o lea auala. O lea ua e alu fai le auala, ona o lona e te lua o ai ma Faasootauloa i le tou falesa. Ou te ofo i le mafai ona

oulua lolotu, a o le auala ua fai i tupe a le Malo, o lo o totogi i tupe e maua mai i tupe o lafoga a le atunuu.

Tofa Hon Faasootauloa Pati Taulapapa: Lau Afioga i le Fofoga Fetalai, e faanoanoa lava le mafaufau, se i saunoa mamalu ea. Faafetai i le Afioga i le Minisita o la e faamuamua mea i le Atua, ae lea o le a faasea i ai ia le sui usufono mamalu.

FOFOGA FETALAI: Ia malo, faafetai. Tulai mai le sui usufono mo Palauli le Falefa.

Afioga Hon FAUMUINA TIATIA FAAOLATANE LIUGA: Ia o le a ou see ese ma lea mea leaga o la ua tu mai le toeaina matua.

O le atinae o le atunuu lautele, ia e sao lelei le mea sa saunoa i ai le Afioga i le Minisita o Galuega, tar sealing o auala, that's the best option ma e cost effective, ae o lea ua ou maua i faasalalauga o le tender o le auala lea e tau i Malua, o la e chipseal. O le chipseal o le material lea, e le fealofani ma le vai. O le mea lena e ala ai ona malepe. Po o le a le lelei o le foundation o le auala lea, e lua lava tausaga ae malepe. O le test na fai i le taimi o au, o le auala i Lepea e tau i Tuae'fu 2004 e oo mai i le taimi lena e le i toe i ai se pu pu. Auala e alu atu i Pesega e tau i Alafua, o auala na e leai se pu pu. Auala e alu atu i Apia e tau i le falemai, na test ai le asphalt. Ma e taugata i le amataga, ae taugofie i le long run. Sili ma Papalii, sui specifications o le aualatele mo le malae vaalele e le fetau, o lona uiga e le umi foi, po o lua tausaga ae toe pu pu, aua e le fealofani le chipsealed ma le vai. O le aualatele lena e matua mamafa lava le traffic, ma e tataua lava ona faa'oga i ai le asphalt materials.

E amata atu i Saina e vai loaloa, e tau lava i Malua e vai loaloa, o le auala e pito i le sami. O lona uiga, po o le a le foundation e fai, ae a faa'oga le chipsealed, e lua tausaga, ua amata foi ona pu pu. Ua tataua foi ona faasaosao ma fai aualalaupapa i uta i Aleisa. E puupuu lena, i le alu i le malae vaalele, o uta i le matu i Aleisa e faigofie, aua o fanua o le Malo. A o tai, ia o le mea la lea e i ai, e lima tausaga aumai le tupe e fai ai, e leai se mea ua faia.

O le a le mea e tupu? Taugata, ae a silasila tou Afioga i Minisita, i tupe na aumai faameaalofa, ma tupe aumai i Soft Term Loans, e le o faa'ogaina. O le tausaga lea na tea atu, e \$240miliona tupe faameaalofa ma tupe faaaitalafu i tuutuuga mama, e na o le \$92miliona na faa'oga. O le a le mea lea e tupu i le isi \$15miliona, e le o faa'ogaina. O le a le faafitauli? E le lelei, o le faalavelave, ua galulue faa-CEO Minisita, o le faalavelave lea, ua outou involve i le process. O le leadership le mea tou te faia, ia o le a outou o la e galulue faa-CEO ae o a mea a CEO e fai?

Susuga Hon Papaliitele Niko Lee Hang: Lau Afioga i le Fofoga Fetalai....

FOFOGA FETALAI: Ia se i tulai mai le Minisita mo Galuega.

Susuga Hon Papaliitele Niko Lee Hang: O se mea lava e fia faamalalama, ou te leiloa ia Sili po o galue faa-CEO, ae o au la ou te galue Faaminisita. Ou te fia malamalama la po o a galuega ia ma te faatinoa la e saunoa mai ai ia le sui usufono mamalu o maua o CEOs.

Afioga Hon FAUMUINA TIATIA FAAOLATANE LIUGA: Faafetai, o mea o galuega faa-CEO, ua faasalalau faafa le taligalu o Taelefaga i Fagalao ma le auala lea e alu atu i Saina e tau i Malua. Aisea? E te tago direct, oulua ia e i le Tenders Board, o le a le mea e ala ai ona sui soo? E tau mai ai i na, e inefficiency. O le a le mea e fesui soo ai specifications, e le o malamalama Minisita i galuega o lo o fai, na o taugata ai o galuega ma tuai ai ona faatinoatinae.

Ia a faasalalau, afai e lua masina e faasalalau ai, faafa, ua valu, ua tausaga atoatoa o delay. O le mea lea e tupu....

Susuga Hon Papaliitele Niko Lee Hang: Lau Afioga i le Fofoga Fetalai....

FOFOGA FETALAI: Ia se i tulai mai....

Susuga Hon Papaliitele Niko Lee Hang: Lea la ua maua le faamalamalama a le sui usufono mamalu. E le faia e maua galuega ia, o galuega ia a CEOs e aumai evaluations ma mea faapena. O le galuega foi lea na e te saunoa mai e Retender, ua ala la ona Retender galuega ona e le o faamalaeina ia specs o galuega. Ae ou te le iloa la pe i ai se isi malamalamaaga a Sili i lea tulaga e te laga. Ae e le o faatinoaga ma galuega ma te aafia i faigatonu ma CEOs, ma te talia fautuaga, ae ma te le toe involve e fai mea nisi mea e sui ai mea ia e fautuaina ai le Tenders Board. Atonu ai o le taimi lea sa e i ai, sa e fai mea faapena, o maua e leai, e follow lava i le process, ma lou faaaloalo lava.

FOFOGA FETALAI: Ia, masalo ua ou manatu e aua le faia se faafinauga i le va o le Minisita ma lau Afioga i le sui usufono mamalu, ae saunoa le sui usufono.

Afioga Hon FAUMUINA TIATIA FAAOLATANE LIUGA: Faafetai, leai e faamalamalama, ou te alu atu, e le o tatalaga le tatou Kamupani e tauva i galuega a le World Bank. E silafia lelei e lenei Maota la e faafofoga mai ia le aufaipisinisi, vaetolu le auala e tau i le malae vaalele, ae aumai le tali a le World Bank, e le qualify se isi o a tatou kamupani local. Na ou finau mauai, na ala ai ona tatala le section e tasi, e fai e le local company, on e iai certain condition. E eliminate le tele o requirements, talu ai o lea ou te manao, e develop le tatou local market ina ia tauva o tatou tagata i a tatou lava galuega i tupe faameaalofa ma faaunegatupe e mama tuutuuga, o a tupe e silafia lelei e le CEO, na ou matua finau malosi, e faaoga local companies. Ana leai, e leai se tatou e fai uma lava e kamupoani mai fafo. E ala la ona faapena, o donor countries ia e ave tupe i totonu o le bank, e demand e aumai ia latou kamupani ma toe foi atu tupe i fafo. O le mea lena e matua eseese ai taua.

FOFOGA FETALAI: Malo faafetai. Ia, se i maea mai le saunoaga a le Minisita.

Susuga Hon Papaliitele Niko Lee Hang: Leai o lou malamalamaaga i mea nei, a aumai lava ia le grant, e fai mai foi e le donor ia le faatinoga o galuega, a finagalo lava latou i le konekarate e faaoga, e leai se mea o le a toe mafai, aua o le grant la e aumai e fesoasoani ia tatou. E le faapea la e aumai le grant

ma aumai ma conditions, ae sui e tatou, o le a la le mea e maua? e toe ave le tupe.

FOFOGA FETALAI: Ia masalo o le...Se i faamalulu atu i le paia o sui usufono mamalu. E manaia le lua fefaamalamalamaiga, ioe e manaia, e sa le fai mea ita, ae ona o lea ua tatou taunuu i le malologa, ia masalo o nisi vaega o le faamalamalamaiga, ia tatou talanoa ai i tua.

Na faataatiaese Taulumaga a le Fono Aoaofa Faitulafono mo lana malologa masani i le itula e 8.43 i le po ma toe faaauau i le itula 9:17 i le po.

Na toe faaauau Felafolafoaiga i luga o le faitauga faalua o le Tulafono Tau Faaofi o le Faatatauina o Tupe Faaopoopo (Nu.1) 2017/2018.

FOFOGA FETALAI: Ou te faasilasila atu ua toe amatalia Taulumaga ma Galuega a le Fono Aoaofa Faitulafono.

Malo faafetai le usufono malo foi le onosai. E i ai le manatu ua faaopoopo le malosi i sui usufono mamalu o le Palemene aemaise le Afioga i le Palemia ma le Sui Palemia ma le Kapeneta, ae faagasolo ma faaauau la tatou galuega.

E fai la tatou malologa o saunoa le Afioga i le sui usufono mamalu mo Palauli le Falefa. Ou te tapa le sui usufono mamalu e faaauau le saunoaga. Ae na o se fautuaga vaivai a le Nofoa, e i ai le manatu o le mea sili o la ua maua e le Kapeneta le finagalo faufautua a lau Afioga e tusa ai o nisi o mataupu e ao ona faaleleia ai foi ia galuega tauave a Minisita. Ae i ai le manatu o le a faapena ona fai la tatou galuega. Ae tulai maia lau Afioga.

Afioga Hon FAUMUINA TIATIA FAAOLATANE LIUGA: Faafetai i lau Afioga i le Fofoga Fetalai, faafetai ua sao i alo le taumafataga a lena itu ma lena foi itu o le tatou malu nei. Faafetai foi ua manuia le tapuaiga a Faauluuluga o Matagaluega aemaise o le Ofisa o le Fono Aoaofa. Na o sina mea lava e fia faamalamalama i le vaega lea ona ou see ese ai lea i le vaega lea o le ma fetufaaiga ma le Afioga i le Minisita o Galuega. O tupe nei e aumai faameaalofa, ma tupe nei e aumai i faaunegatupe e mama tuutuuga, o tupe a tatou e pule ai foi tatou, e le pule ai se isi. Ae ala ona demand mai e donor countries o la foi e manao latou e toe maua sa latou tupe i tupe ia. Ae a malosi le tatou finau ma allow as exemption i faiga faavae a le Faletupe o le Lalolagi, e matuu mai lava pe a lava mafuaaga. O le mea lena na ala ai ona matala mai le faitotoa mo se tasi o tatou local kamupani. Ma o le mea foi lena o lea ou te tuualalo atu ai i le Afioga i le Minisita o Tupe ma le Minisita o Galuega, o la oulua matafaioi lea, aua le palaaai. A vaai atu loa e paepae le pau o le tamaloa ona fefe fua lea.

FOFOGA FETALAI: Ua ou manatu e mama ia le sausu a lau Afioga. O le mea sili o lea ua fetuunai lo lua finagalo ma se tofa mauaiga foi i le Kapeneta e ala i le Afioga i le Minisita o Galuega. O le a silasila totoa i ai e tusa ai o le fautuaga a lau Afioga. E i ai le manatu, see ia i se isi vaega o lou finagalo e pei ona i ai se mea o lo o finagalo i ai le itumalo e faaleleia.

Afioga Hon FAUMUINA TIATIA FAAOLATANE LIUGA: Lau Afioga i le Fofoga Fetalai, ua uma ona faataatia ou manaoga, ae o lea ua ou oo i le tulaga o fautuaga, ina ia faaoga ai tupe e tele ia e totoe, e le o toe aoga la i tausaga ua mavae, ae o le tausaga nei, ma le lumanai.

FOFOGA FETALAI: E manatua foi e lau afioga o lou lava lea finagalo. O lou finagalo lea e pei ona faaalua, o lou lava lea finagalo. Ae ese foi le tulaga o lo o i ai le fugalua o le Kapeneta ma le Minisita o Galuega. Atonu e ese foi lea vaitau sa i ai lau Afioga, a o lea foi ua sui i lena vaitaimi. Na ona faamanatu atu, ae tulai mai lau Afioga.

Afioga Hon FAUMUINA TIATIA FAAOLATANE LIUGA: Faafetai. Lau afioga e le o sou manatu, o faamaumauga lea ou te talanoa i ai. Ae e i ai fofo o faafitauli, o le tatou Budget lea na uma atu ma lena foi, o lea foi expect e surplus le Budget lena. O le Budget lea na uma atu, e tele foi le surplus, a o la lava e tele e atagia mai, e pei e foliga ua leai ni tupe. Sole e faulalai tupe ia e i outou aao ma o matou lima. O le mea lea e tupu, o le leadership ma le management. E pei lava ona ou fai atu, o le process ma le leading roll e eseese mea e lua. A silasila lava i le faataatiaga mai o le Tala o le Tupe, o le tele o vaega ia e i luga o le laina, e control e output managers. O le faafitauli lena o lea e tupu, e le galulue faatasi ia taitai o outputs taitasi a Matagaluega. O lona uiga, a manatu lava le output managers ia e maintain lana ia component ona le vaai lea i le need o isi divisions. O le mea lena o lea e tupu. E ova i le \$10+miliona le tupe e le o faaogaina i luga o le laina.

FOFOGA FETALAI: O lau Afioga foi o le Peresetene o la outou ekalesia. E i ai le upu faafaipea, ðo manatu e taumafai atu nei, e le o se faatonuga a o le fautuaga. ð I te i ua e faatonu le Kapeneta, e pei e faapena se lagona.

Afioga Hon FAUMUINA TIATIA FAAOLATANE LIUGA: Lau Afioga na maona a lau tala o le tuualalo.

FOFOGA FETALAI: O le tuualalo, oi ia.

Afioga Hon FAUMUINA TIATIA FAAOLATANE LIUGA: Ou te iloa e te lei maua mai, o lena e pei e te faagasegase.

FOFOGA FETALAI: Tulou o le mai lava o ponaivi vaeatu le faafofoga a le atunuu ae lelei le faalogo.

Afioga Hon FAUMUINA TIATIA FAAOLATANE LIUGA: Faafetai lava i lau Afioga.

FOFOGA FETALAI: Faamaea ia le sausau a lau Afioga i le toaina.

Afioga Hon FAUMUINA TIATIA FAAOLATANE LIUGA: O le isi mea e alo tele i ai ia Matagaluega, fai mai o avanoa e le i faatutumu ina. O le latou lava lea alofaga i taimi uma. Ae a silasila i ai a outou Afioga, e ala ona vacant ia positions ia, ou te le iloa ai po o le a le mea na established ai, e fiu e faasalalau e leai se isi e apply i ai, o lona uiga a o la lava e fai galuega ma

uma. Na o le faafulafulaina o Budget, ae le o faaaogaina. O le isi mea lau Afiogaí .

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui: Lau Afioga i le Fofoga Fetalaií .

FOFOGA FETALAI: Se i tulai mai le Palemia.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui: O mataupu nei e le fou, o lea ou te fautuaina le sui usufono o mataupu nei e le fou, e leai lava se mea fou. O mea lava ia sa e i ai, ma o tulaga na o lea e taumafai pea le Kapeneta e faufautua ia i latou o Faauluuluga o Matagaluega. E i ai foi le faaeteetega o le Minisita i le vatapuia ma Faauluuluga o Matagaluega. A silasila mai lau Afioga e le o tali atu ia Minisita, o le mafuaaga o mea tonu lava lea latou te faia, o lea latou te faia o mea sa i ai foi i lou taimi. Sa ou manatu e te vave see ese ma lena tulaga, ae agai tonu mai i mataupu ia e te finagalo i ai mo lou itumalo. Ae e le fou mataupu ia e te laga.

FOFOGA FETALAI: Tulai maia le sui usufono, see ese ma lena tulaga aua e moni lava o lou finagalo e pei ona e naunau, ae o le mea sili o lea ua maua le fautuaga. O lea ua maua mai lou finagalo, alo ia i se fautuaga ma se tuualalo e pei ona e saunoa.

Afioga Hon FAUMUINA TIATIA FAAOLATANE LIUGA: Faafetai i lau Afioga faafetai foi i le finagalo o le Afioga i le Palemia. E sao lelei, ae pei ona o le faaaauu pea ou te iloa o lena e I ina le uta ma le tofa e fai ai. O nisi vaega lea ina iaí ..ou te iloa o lea lava e pulu salalau le BMU responsibility, sa ou fautuaina i le Fonotaga talu ai, pe a pe a fai se central BMU, e control ina le implementation o tatou projects. Aua o le vaega tonu lava lena o lea e le o mafai ona faaaogaina ai le tele o tatou tupe, ona a nofonofo lava le BMU o le project ia ona leai lava lea o se mea e faia. Ou te iloa a centralize i lalo o le Matagaluega o Tupe, ou te iloa o le a effective ma efficient.

FOFOGA FETALAI: Se i tulai mai le Minisita o Tupe.

Afioga Hon Sili Epa Tuioti: Na ona faailoa atu o la ua faatino nei le tulaga lea, ona o faafitauli i le tuai ona faatino galuega, o lea ua uma ia feutagaiga ma le World Bank ma le ADB o lea ua malilie mai, aemaise lava tomai ia e manaomia tele i le tulaga e pei o le procurement, tulaga tau financial management, tulaga o le monitoring ma le evaluation, ma i latou e fesoasoani i le faatinoina. O la ua amata ona faakonekarateina i latou o le a omai e tuufaatasia ia tulaga na, ma tuu i totonu o le Ofisa o le Tupe ina ia faapena ona faagaioi ai ia faatinoga o galuega. O lau ua faatino, ua uma ona talia e le Kapeneta ia le fautuaga lea sa tuuina atu i ai. Faafetai.

FOFOGA FETALAI: Tulai mai le sui usufono e faaiu mai le saunoaga.

Afioga Hon FAUMUINA TIATIA FAAOLATANE LIUGA: Faafetai. E avatu le faafetai tele i le saunoaga i le Afioga i le Minisita, avatu foi le faafetai tele i lau Afioga i le Fofoga Fetalai mo le avanoa. E avatu foi lau faafetai tele i le Afioga i le Palemia ma le Sui Palemia ma le Kapeneta ma lena itu faapea foi lenei itu. O tatou galuega e fai faatasi, e le faapea e malaese i ina malaese iinei. O la tatou galuega e fausia ai Samoa ina ia mautu. Faafetai i le matou asiasiga i le falepuipui, faamalo i lau Afioga i le Minisita o le Falepuipui. E tele le galuega ua fai ae le faigofie, ou te iloa e feoloolo le gaoa o le taulaga fou i Salelologa, i le mea lea o lo o tu ai nei le falepuipui, ae e avatu le faamalo. E fautuaina lau Afioga ina ia vave faatino le auala, ina ia faafaigofie ai ma lelei ai taavale, e fai sina gaoa ma e aoga foi mo o tatou tagata lea o lo o faaaogaina fanua o lo o ui atu ai le auala i le falepuipui. Ae ua faamalo le galue. Faamalo foi le lototele. E avatu ai le faafetai tele i lau Afioga, o lena ua uma ona faaali atu finagalo o afioga i sui usufono e avatu ai le faamalo.

Ia faamalo foi i le Kapeneta, faamalo i lau Afioga i le Minisita o Aoga. O le tausaga lea sa ou tuualalo atu ai i le tulaga o tamaiti nei ua le o toe o i aoga ina ua uma le vasega 8, ua maua le faamatalaga mai le tele o matua, ua faapena ona faamanuiaina ona o polokalame ua faataatitia. Ae silasila foi e pei o nisi o fautuaga na avatu e Afioga i sui usufono, o le tulaga lea pe le i toe tataua ona silasila i le Polytecnic ma le NUS, ona o lo o i ai le tulaga e foliga ua faaletonu polokalame ina ua tuufaatasi, ua le o i ai se concentrations i le aoaoina o poto faapitoa nei po o trades, aua e eseese ma le aoaoina o le mafaufau. E tasi ai foi lau tuualalo, e maua tele ia le level lea e te lua talanoa ai i faiaoga ma le CEO, e faafaigofie le gagana, fai mai ua maua tele lua mafaufauga ua fai i luga ae le omai i lalo i le mea o la e i ai le latou level. E pei ona pau lena o le tuualalo atu, e faafaigofie le presentation. Ae e pei o le mea lena na saunoa mai ai lau Minisita Lagolago, le susuga i le alii faafeagaiga o le matou ekalesia le Worship Center. Manuia tele o outou faiva, manuia lau Afioga i le Palemia o le Sui Palemia, ma Minisita o le Kapeneta, Afioga i Minisita Lagolago, faapena foi i lenei itu. O outou mama na, aumai mamafa matou te feoai ma matou ma tatou galulue faatasi ai, ina ia manuia outou faiva manuia matou faiva. Faafetai i lau Afioga i le Fofoga Fetalai.

FOFOGA FETALAI: E i ai lava le muagagana foi lea, ōua taoto le ata o Malofiti ae taatia le ata o Tauleleia e pei o le fetalaiga i le Samoanagalo. E ala i lau tuualalo ma lau fautuaga, o lena ua faafofoga le Kapeneta, malo faafetai. E faapena uiga o la tatou galuega, ma o lo tatou tiute lena, o le fautua i le Kapeneta ma le Malo, e faapena ona matimati ai lo latou faiva alofilima, i le galueaina o le atinae o Samoa. Malo faafetai saunoa i lau Afioga.

Ma o le avanoa lena e tulai mai ai lau Afioga i le Taitaifono o le Komiti o Tupe Maua ma Tupe Totogi, le sui usufono mamalu mo Alataua Sisifo.

Afioga ALIIMALEMANU ALOFA TUUAU (Alataua i Sisifo): Faafetai mo le avanoa, lau Afioga i le Fofoga Fetalai faapea foi sui usufono mamalu o le Palemene o Samoa ua faatasi mai ma Samoa foi o lo o faafofoga tapuai mai. Faafetai i le Atua soifua mo lena avanoa matagofie, ou te tulai atu ai se i fai se sao o le Alataua i Sisifo i le Tala Faatatau Faaopopo (Nu.1) o le Tupe 2017/2018.

E faatalofa atu foi isi ou itumalo, e avea ai lenei avanoa e faamanuia atu ai le tausaga fou i le Alataua i Sisifo. I le afio o Tapaau ma nofo a Faalupea, lau fetalaiga Folasia o le fofoga o Papa. Afio Misa ma le Usoalii, afio le Seuula ma le Aiolupotea, alaalatai lau fetalaiga Momoemausu ma le Lauti na Laulelei. Afifio Tapaau ma le aiga Samoeleoi, alaalatai a laua Tamaigoa, le mamalu o le nofo a Pule ma Faleauga ma upu ia te oe le Alataua. Faamalo folau, e le galo i le loto oe ma lau tofa faalele, ina ia momoli mai lou finagalo i le Fonousu a Samoa e ala i lou sui usufono.

Lau Afioga i le Fofoga Fetalai, i saunoaga a sui usufono mamalu agai i le Tala Faatatau Faaopopo o le Tupe, o lo o fesiligia pe faaalua ai foi nisi o mataupu e agai i le Lipoti a le Komiti o Tupe Maua ma Tupe Totogi, e tataua ona tali atu i ai. A o le i tuuina atu la se tali i fesili a sui usufono mamalu, ma avatu foi se manaoga faamanatu o lenei itumalo, e fia fai sau tala i le vaaiga lautele i le soifuaga i lenei vaitau ua tatou i ai.

Ua lafo atu le anoanoai o manaoga o itumalo uma, ma e faamautuina ai le tulaga ua i ai le soifuaga i lenei vaitau, i le tupu pea o o tatou manao, ma lo tatou soifua faatusatusa i isi atunuu i fafo. O lea e ala ai ona lalafa atu manao o itumalo taitasi, ae faapena foi ma si o matou itumalo. Ae na ona ou faatepa lava o lenei Palemene, pe a tatou vaavaai i le Televisi i faalavelave tutupu i isi atunuu o le lalolagi, le vaaiga i le soifua sauaina ma le matelaina, le vaaiga o le fiaaai ma le fia feinu. Ua lava a le molimau ola lena e faamautu ai pea le manatu o lenei itumalo, o Samoa o le atunuu faamanuiaina. Faamalo mo galuega lelei uma sa faatinoina i le tausaga ua tuana'i. I le taimi ae ou te le i oo mai i le Palemene, sa pei e maniti ou tino pe a ou faalogo mai i lauga a sui usufono i le tele o aitalafu a le Malo. O nisi o lauga ua taua ai le gau po o le bankrupt o le Malo, ua le mafai ona totogi ia aitalafu. Ae peitai ua oo mai ma ua galue tonu lava i le Komiti lea e auilili ai Tala o Tupe a le Malo, na vave lava ona sola lou popole i le masina muamua ina ua malamalama ma maua le avanoa e faitau ai i Tala o Tupe. Faamalo le galue ma le tauivi mo le atinaeina o le tamaoiga. E pei lava ona maua i saunoaga a nisi sui usufono, a tatou le nonoina mai tupe, ou te le iloa po o fea e i ai le tulaga o le atinae o le tatou Malo i lenei vaitau, pe ana leai nonogatupe ma tupe faameaalofa mai fafo.

O lo o faamauiina i le faamatalaga o Tala o Tupe a le Malo i le tausaga 2015/2016, ua pau i lalo a tatou aitalafu i le \$49,000miliona. Ou te faafetai ai lava i le Minisita o Tupe i lea tausaga po o ai sa i ai ou te le manatua. E le gata i le Minisita o Tupe i lea vaitau, a o le Kapeneta atoa. Ou te talitonu o le tulaga foi lea o le a oo i ai le 2016/2017 pe a oo ina oo mai le Tala o le Tupe. O le mea taua o le mafai ona totogi o a tatou nonogatupe i tupe maua i o tatou lava lima. E faataua ai le manatu lea sa laga e se tasi o sui usufono, e tataua ona amatamea atu tatou o sui usufono ona faamalamalama i o tatou itumalo le tulaga o lo o i ai le Tala o le Tupe a le tatou Malo. O la e ua amata ona ou faamatalaina i lo matou nuu, o la e ua malamalama le nuu lea o Neiafu, toe lava la o nai isi nuu e lua lea e le i oo i ai lau faasologa. O le mea foi la lena e le tele ai ni manao o Alataua Sisifo, leaga foi o la e ua latou iloa le tele o galuega ia e taumafai atu i ai e faatupe mai nonogatupe mama, e faatupe mai a tatou meaalofa mai tatou paaga mai fafo. O nai tupe lava e maua mai o tatou lima, lea e faagaioi ai Matagaluega a le Malo, faapea foi galuega e mafai ona faatino.

Lau Afioga i le Fofoga Fetalai, e i ai nai manatu e fesootei ma faamatalaga tau tupe ou te fia talanoa i ai, e mafua ai ona ou tapa le avanoa lenei mo le Taitaifono o le Komiti o Tupe e folasia ai nai motugaafa. E faataua ai e le Alataua i Sisifo le saunoaga ma le folasaga a le Afioga i le Palemia i le tatalaina o le semina foi lea faamasani a sui usufono o le Palemene Lona XVI lenei ia Mati 2016. O le mataupu na tautalagia ma faamamafa, o Galuega Mataitu a Ituu Fefaatauagai e Tolu o Faigamalo, e mataitu ai e le Pulega Faatonu le Palemene ma le Faamasinoga, e mataitu foi e le Faamasinoga le Pulega Faatonu ma le Palemene, e faapena foi ona mataitu e le Palemene le Faamasinoga ma le Pulega Faatonu.

E pei ona silafia lelei e lenei Maota ma Samoa o faafofoga mai, o lenei galuega mataitu, e siaki ai e le isi itutino le isi itutino, o se aiaiga o tatou tu ma aga o Faigamalo Faatemokarasi na filifilia e tomatauina ai a tatou Faigamalo ina ua Tutoatasi Samoa i le 1962. O le taua la o le toe faamanatu o le aiaiga e mataitu ai e le isi itutino le isi itutino lau Afioga i le Fofoga Fetalai, ua le augata ai pe matamuli foi pe nofoai foi, e le avatua se fautuaga, ona o le tatou avega e tauave faatasi. E le mafai la ona aloese Alataua i Sisifo ma le tiute mataitu a le Palemene lea o lo o faatino atu e Komiti Faa-Palemene i le iloiloaina o galuega a le Malo e pei ona tuuina mai i lipoti a Matagaluega ma Faalapotopotoga a le Malo.

Lau Afioga i le Minisita o Tupe, sa i ai le manatu o le a i ai i le Tala Faatatau Faaopoopo Muamua lenei o le Tupe se tatou fesoasoani i le faatauina o le tatou vaalele fou. Faafetai o lea ua faatino le tatou miti ina ia i ai lava se tatou vaalele. A o le fesili i lau Afioga i le Minisita o Vaalele, e fia lava le tau atoa o le tatou vaalele? Ou te talitonu o ituaiga galuega tetele faapea, e le gafatia e si o tatou tamaoaga le faatau motu, afai la o la e faatupe e le finance lease, pei ona tuuina atu e nisi o sui usufono e fia la le tatou finance lease payment i le masina? O lea faatoa lua masina talu ona i ai le vaalele, ma e talitonu o lena ua maea ona auiliili uma faatinoga sa lelei ona faatino o le tatou kamupani vaalele o le Polenisia e faatonutonu ai le tatou kamupani fou. Ae o le miti lava ia a le Alataua pei ona maua mai i nisi o saunoaga, ia lua pe tolu ni tatou vaalele, ina ia mafai ona kava mai e le isi vaalele ma lana route se faaletonu pe a oo ina tupu mai ia ni faaletonu po o ni tupe pau i le isi route. Na o se miti leaga o lea e tau faasoasoa a tatou tupe.

Ona oo mai lea o se faamatalaga i lau Afioga i le Minisita mo le Falepuipui, faamalo i le tulaga ua i ai le falepuipui i Tanumalala faapea le faataua o le human rights ina ia vave ona siitia atu i le nofoaga fou. O le manaia ia o le nofoaga fou, e pei ona fesiligia e nisi o sui usufono pe na faaoga lelei le \$3.8miliona lea na tuuina atu i le tausaga faaletupe lea o le a mavae atu. O le tali pei ona tali mai ai le konesale i le asiasiga a le Komiti, o lo o matua faaoga tata tupe na tuuina atu, ma ua faapea foi ona asiasi le tulaga lelei ua oo atu i ai le fausiaina o le falepuipui.

Na faalogo atu e lata i le \$20miliona e ono faaalu. O le tuualalo, se i toe tagai ane lava pe le ono toe fetuunai ia vaegatupe ona e tagi lava i o tatou lima ia galuega aua e le maua se tatou paaga mai fafo e fesoasoani i lea ituaiga galuega. O le popolega, ne i mananaia tele facilities ma avea ma mea e fia nofonono ai pea i Tanumalala le toatele, o le manaia o le ea, ma le vaai atu i le manaia mai o laufanua o Savaii, i le manaia o le tualga o lo o i ai le tatou falepuipui. A o le fesili; e foia ai le faaaitaui i le faatupulaia o le taofia o tagata i le falepuipui? Ona i ai lea o se vaivaiga, a le fofoina tonu le

faafitauli, e toe fau foi nisi faaopoopoga o le falepuipui i le isi 20 tausaga lea e i luma. Ou te talitonu o le atiaaina o pisinisi, ina ia maua ai galuega ma faamalosi pulega a alii ma faipule, pei ona i ai le polokalame o lo o taumafai atu i ai le Afioga i le Minisita ma le Matagaluega o Tina ma Tamaitai, Atinae o Nu'u, Afioga ma Agafesootai, lea e tatau lava ona taulamua ai le sui usufono, atonu o le a faaitiitia ai le aofai o e nofosala.

Lau Afioga i le Minisita mo le Siosiomaga, e leai sau vaegatupe o i ai i totonu o le Tala Faatatau Faaopoopo o le Tupe, a o le fatu lenei o lenei sui usufono, o le puipuga o le siosiomaga. A ou vaai atu i pepa nei e fau i luga o tatou laulau ma lalo i i le floor ma le mau tusi, ona ou faanoanoa lava lea ma ou mafaufau i le tele o laau lea ua tatou taina i lalo aua le tautuaina o le Palemene. O lea ua amatamea le Kapeneta i le faaaogaina o le tekonolosi e faitau ai a outou pepa o fonu. O le tuualalo, ona o lea ua amata e le Kapeneta, ae a pe a sosoo atu ma le Palemene e ala lea i se Tulafono ina ia oo atu i le isi tolu tausaga ua le toe faaaogaina ni pepa i fonotaga. E oo foi i le matou itu, sa tufa mai a matou laptops i le amataga i le taimi faatoa matou omai. Na ou fiafia lava la faapea o le a ou sau na o lau laptop e faitau ai au pepa o le Fonu. Ia, na ona faapena atu o se tala, e sefe ai tupe i pepa, faasao le siosiomaga, faasao tupe a le Ofisa o le Fonu, sefe taimi o le afaigaluega e fai ai photo copies ma faaoga ai le siitia o le tekonolosi fou lea ua toetiiti faataunuu lea miti a le tatou Malo. Ia, o nai moomooga na ia le toe faaaogaina ni pepa i a tatou Fonu i le isi Paeaiga o lo o i luma.

Lau Afioga i le Minisita mo Fesootaiga, faamalo faafetai o la ua ola le TV a le matou nuu, toe lava o nai mea itiiti e faaleleia atili, malo galue.

Lau Afioga i le Minisita mo Aoga faapea le Matagaluega, ou te iloa o oe lea ua alu atu uma i ai viiviiga o lenei aso ma le aso ananafi, malo galue. E le tau selu atu, ae faataua foi e Alataua i Sisifo le manatu lea o le tuueseina o aoga ma le matata eseese mai le Iunivesite. O le faataitaiga, o le aoga lea a le Marine Maritime School, e toavalu nai tamaiti o le matou itumalo ua iu atu ma latou tusipasi ona toe o atu lava lea nofonono i tua ma fai le tasi aiga, ona e le ausia e latou tusipasi le o atu faaseila, seafarers. E leai lava ni avanoa faigaluega o maua e nai tamaiti o le matou itumalo, ae talosia ia o lea ua i ai se tasi o alo o le atunuu lea ua tulai mai i le tulaga o le Pule i le Samoa Shipping Services atonu o le a maua ai ni avanoa faigaluega aemaise o le siitia o le tulaga o ia aoga matata eseese.

Ia ona faaiu lea o se manatu lau Afioga i le Fofoga Fetalai i nai fesili ia na laga i le Tala Faatatau Faaopoopo o le Tupe (Nu.1) i lenei tausaga. O lea ua uma ona tali atu i le tulaga o i ai le falepuipui ma le asiasiga a le Komiti, sa i ai foi se fesili na laga i le siitia o totogi e faaoga i ai le surplus lea e i totonu o le Tala Faatatau o le Tupe. Mo le silafia, o le surplus lea, a tagatagai lelei i ai, na ala ona i ai le surplus ona o le tatou soft term loan lea na aumai e faatupe ai a tatou project payments. E le mafai la ona faaaogaina le tupe lea e fai ai ni siitaga o totogi, aua foi e le sustainable. E uma loa le loan e le iloa pe faapefea ona toe faaauau atu isi tausaga o lumanai. O le mafuaaga lena; e le faapea a vaai atu ua surplus ona faapea lea e mafai ona tatou faaaogaina atoa. O le surplus lena, o lena e i ai i totonu soft term loans ma budget support, e pei lava ona taua i se faamatalaga, e taua le malamalama muamua o tatou sui usufono ona tatou faamalamalama lea i tatou itumalo, ia aveesea ai le lagona lea ma le manatu tuufesili ma le le mautonu faapea o lo o i ai se faaletonu i tupe a le Malo.

O le isi fesili i le Lipoti e silia i le fa tausaga e le i faaogaina le tupe lea i le auala i Saina i Faleata agai i Malua. E talitonu o lena sa aafia atu i le saunoaga a le matou Sui Taitaifono o le Komiti o Tupe le taliina o lena fesili.

Ma le fesili mulimuli, i le tupe faasao mai lea i le Yazaki e \$600+ pe le o avea se fesoasoani i isi kamupani o lo o i ai nei? Ou te talitonu o le lisi a le Yazaki o se tuutuuga faapitoa lea sa ala ai ona tatou totogiina lea lisi, ona e 3,000 tagata faigaluega sa mafai ona latou faafaigaluegaina, ma o le taimi nei, e toalaiti lava nai tagata o lo o faafaigaluegaina e kamupani la e i ai nei, o lo o totogi sao lava latou lisi i se tau maualalo.

Ia lau Afioga i le Fofoga Fetalai, na o le lua lava nai manaoga nei o le matou itumalo o mea e toe faamanatu, o lea e soiso mai le Afioga i le Minisita mo Aoga, o lea ua matua tele lava ou ai i le aso lenei ma le aso ananafi, ia tagai ane loa laia i le ta faleaoga faaitumalo i Alataua i Sisifo, ua faafa ona faamama le fanua ma sua ma faatalitali mai lava nai toeaia. Ia ona pau lena o le tulaga e lafo atu pea, ina ne i toe oo atu i le isi taimi ua toe togavaomatua le tulaga ua uma ona faaavanoa mai mo le matou faleaoga.

Lau Afioga i le Minisita mo Galuega, faafetai, ua maitau atu o lea na oo atu tama i le tolu masina talu ai ma fua autafa o le auala, ua lava a le fua lena ou te iloa ai o le a oo atu le faasologa i le matou itumalo.

Lau Afioga i le Fofoga Fetalai, ua uma atu fanoga o lenei itumalo, ona faapea lea o se taofi, o le a foi le leo o Alataua Sisifo, o le a se upu ua le taugamalie i le faafofogaaga, ia tofamalie ma utamalie. Ia alofagia e le Atua lau Afioga i le Fofoga Fetalai, ia maua lou malosi, maua lau tofa aua le faafoega o le Maota o Samoa. Ia agalelei foi le Atua i lau Afioga i le Palemia, Minisita o le Kapeneta ma Minisita Lagolago, maua foi le malosi e lenei Itu o le Maota, ia faapea sui o Matagaluega o lo o tatou faatasi i lenei afaifi. Ia folau i lagima le sa o Samoa.

Lou itumalo Alataua Sisifo, ia faamanuia tele le Atua i le tatou itumalo. E faamuli ma le ai le faafetai i le Failautusi ma le Ofisa o lo o tautuaina le Palemene. Soifua.

FOFOGA FETALAI: Malo faafetai. Ua logo faatutuila le faafofoga tapuai mai a Samoa ma lou itumalo, a o faapena foi ona silamio le Palemene ma lenei tauafiafi, e pei lava o le upu e fai ia Saleaamua e tusa ai ma le saunoaga a lau Afioga i le Taitaifono o le Komiti o Tupe Maua ma Tupe Totogi a le Malo. Malo faafetai, aua e le tau laeia, e le tau faafuluina le toga lelei e faapena foi le upu e fai i le maa e fai ai ai o le taulafoga. Malo le galulue e ala i le taitaiga o le Komiti o Tupe Maua a le Palemene.

Ma ua ou manatu o lea ua maea ai i saunoaga a sui usufono o le Palemene, aua e pei o tulaga masani ma aga a le Palemene, o le saunoaga e faaiu ai saunoaga a sui usufono mamalu, o le saunoaga lea a le Taitaifono o le Komiti o Tupe, aua o le tiute foi lea o le Komiti o Tupe, e saunoa e talifuaitau ma fesoasoani atu i nisi o mea sa laga e sui usufono mamalu. Ia pei o le tulaga lea o lea ua i ai le tatou galuega i lenei itula afaifi, ma ua ou manatu, o lea ua oo i le taimi e talifuaitau ai le Malo.

Ia lafo atu ia i lau Afioga i le Palemia ma lou auvaa i le faasologa e te finagalo i ai, e ala i mea sa laga e sui usufono mamalu.

**Susuga Hon TUILAEP AUELUA FATIALOFA LUPESOLIAI
LOLOFIETELE NEIOTI AIONO GALUMALEMANA Dr. SAILELE**

MALIELEGAOI: Lau Afioga i le Fofoga Fetalai, ou te tulai atu e momoli atu le faamalo i le paia o sui usufono mamalu na sausaunoa i le tatou Fonotaga lenei i le Tupe Faaopoopo. Ma ou te manatu o le tasi lenei o Fonotaga maoae o oa o mafaufauga, e atagia ai le loloto o le malamalama i le Tala o le Tupe ae le gata i lea a o le tulaga o lo o faafae ai tupe eseese a le tatou Malo ma faatupe ai galuega a le tatou Malo. Ia o ai se o le a le mimita? E ala ona ou avatua le upu lea, ona o lea e sausaunoa mai ai outou, ae a matou talanoa i ai, e leai lava ma se isi e talitonuina upu a le Kapeneta. Aisea? Leaga o matou lea e nafa ma le faatinoina o galuega. E mafai lava ona faapea i latou e faalogologo, e le moni uma nei mea e sausaunoa mai ai Minisita o le Kapeneta. A o lou fiafiaga, o le tulaga atoa o le faavae o le faatupega o le tatou galuega o lo o fai nei, e le gata i a tatou lava seleni o lo o saili i le lotoifale, ae faapea foi ma fesoasoani e auuala mai fafo i foai. E le gata i foai a o nonogatupe e mama le tului. O le faavae atoa lena o le tatou nonogatupe, tatou te le o i le open market e borrow mai ai i faletupe tetele o commercial banks e pei ona masani ai le tele o atunuu tauatia. O atunuu foi la na o lea e feagai ma le faafitauli o le tau togitogi o latou nonogatupe, a o Samoa, mai lava i le amataga, e tatou te agai lava e faaoga fesoasoani ia o lo o mafai ona tatou maua mai faletupe tetele o le lalolagi na faatu e atunuu tetele o le lalolagi e fesoasoani i le faatupega o atinae i atunuu e vaivai lo latou tamaoaga. O lea la ua sausaunoa mai le Maota i le po lenei, a ua mama foi le matou avega. O lea ua sausaunoa outou i totonu o le Komiti o Tupe, o outou ia e lipoti sao atu i ai le Matagaluega o le Tupe, o le Komiti foi a outou lea e lipoti sao atu i ai le Suetusi a le tatou Malo e faatatau i le tulaga o i ai mea tau tupe a le tatou Malo. O le fiafiaga lena ia te au, e le taumate foi le Kapeneta nei ona o le loloto o le faatofalaiga ua sausaunoa i ai a outou Afioga.

Liliu mai la i le galuega a le Kapeneta i lenei itula afiafi, ia e le toe i ai se manatu ia te au e toe faaumiumi sau tautalaga, ae o le a sauni loa le Kapeneta e tali atu i nisi o mataupu na laga, ma o le a amata mai i le Afioga Hon Afamasaga i le po nei ona faasolosolo mai ai lea, ae o le a ou talituaa atu i i i nisi o mataupu e ono laaloa ai le tali atu a Minisita o le Kapeneta.

Lau Afioga i le Fofoga Fetalai, ia o le faasologa lena o le matou galuega i lenei po.

FOFOGA FETALAI: Malo faafetai. Ia tulai maia lau Afioga i le Minisita mo Fesootaiga ma Faamatalaga Tekonolosi. E lelei lava ona faigofie pe a saunoa sao lava i mea sa laga e sui usufono mamalu e tusa ai o le tatou Tulafono.

Afioga Hon AFAMASAGA LEPUIAI RICO TUPAI (Minisita mo Fesootaiga, Faamatalaga ma Fesootaiga Vavave Faaneionapo): Faafetai tele i lau Afioga i le Fofoga Fetalai. Ou te manatu foi e le toe tau aufagaina paia o Samoa i lenei afiafi i se faamatalaga. O lea ua maea ona lagolelei ma ua faapea foi ona maea ona mamanu faatiti o tausala i le tele o tootoo o lenei afiafi ua mavae atu. E manatu foi o lenei aso ua lauiula ae pou i toa i le alofa ma le agalelei o le Atua o lea ua soliata le taulaumea ma ua faapea foi ona malu mai le pogisa, a o lea ua lefulefua mai le faatamasoaliiga i lenei afiafi a le paia o le Palemene. Ia o le faiva ma le faatautaiga a lau Afioga i le Fofoga Fetalai, aemaise foi o le paia i sui usufono eseese ua faapea ona tofia mai

itumalo eseese o le tatou atunuu, aua le lotea ma tatou faapena ona saausi upu aua le lumanai o le atinae o le tatou atunuu i ona itu eseese. Ona manatu lea e faapea, o le Tala o le Tupe i lenei afiafi e pei ona sasaa i ai le fafao ma faapea ona tatou felafolafoai ai, ua matua lagolagoina atoa e le itumalo lenei o Aana Alofi Nu.1. Ua faafofoga maua foi Samoa aemaise o si ou itumalo, ia e leai lava ma se sui usufono sa faapea ona lagalaga se finagalo i matafaioi a lenei Matagaluega e faaalua ai se faagaulemalie po o ni galuega e le i faapena ona faataunuina, seia vagana ai finagalo e lua sa faapena ona momoli le agaga faafetai ona o le faataunuina o nisi o manaoga sa fofogaina i a tatou Fonotaga ua mavae. Ia ou te manatu la a faapea e maka e le faiaoga lenei ituaiga faiga faapenei, lona uiga e 12/10 lau Afioga i le Fofoga Fetalai faapea foi le faafofoga a le Maota ma Samoa o lo o maua mai nei faasalalauga. O lona uiga la, e tataua ona ou faafetai i le Ofisa Sili o Pulega o le Matagaluega o Fesootaiga ma le mamalu o le afaigaluega ae faapea foi le Pule Faatonu ma le latou Ofisa, a o le Pule Sili foi o le Falemeli i matafaioi tausii ma tulaga uma o lo o faapea ona faatino i le tulaga maualuga o lea ua outou faafofoga mai, na o le agaga faafetai ua faaalua e sui usufono mamalu i lenei itula afiafi. O le tulaga sa fesiligia e si o matou itumalo ma le Afioga i le Tuiatua Faanofonofu, ia leaga o lea sa finagalo i se faamatalaga, o le mea sa tupu, sa faapena ona fesopoi frequencies po o alaleo faasalalau sa faaaogaina i le tatou itumalo ma le Malo o Amerika Samoa i se isi itu. Ona alu faapitoa lea o le malaga a le Pule Faatonu i Amerika Samoa se i tagai mo lea tulaga. Sa i ai le talosaga ina ia sui le latou alaleo e faaaoga, peitai ona o faiga faavae a le Malo o Amerika, o le ala lea e le mafai ai. O lea la ua i ai le tulaga ua faapea ona malilie i ai ina ia ki ki i lalo. E pei o le ala lena ua faapea ona maimoa i ai si o tatou itumalo i le televise ma tatou faasalalauga ua faalelei atu i lenei taimi.

Ia ona ou manatu lea, se i ou liliu ane i si ou itumalo ma le tapuaiga, ia, le paia o le itumalo o Aana Alofi Nu.3, mai lava i Fasitootai, Vailuutai, faapea Faleatiu, Satapuala ma Satuimalulufi. I le paia aua le afifio o le Aiga Taulagi ma le Maopu o le Tuiaana, ae tainane le mamalu i le Falefitu ia te oe le alii o aiga ma le mamalu i le fale Fasitoo, ae tainane le afifio i le paia o Aiga ma lau fetalaiiga Talimatasi ma le mamalu i le Faleaana. A o le faafofoga mai foi a lau Afioga i le Saoalii, le paia i le aiga Sa Tuala, lau fetalaiiga Vaili o le Laau na Fausia aemaise le Faleaana, ae le gata foi i lea, o le afifio o Aloalii, le Tamaitai e tasi i Aana, lau Afioga Letelemaana, ae tainae foi lau fetalaiiga Peipeigamalie ma le mamalu i lo outou Toafa ma le mamalu ia te oe Satuimalulufi. Ou te manatu tau lava ina momoli atu le agaga faafetai i la outou tapuaiga, i fatafaitaulaga e fia ma le nofo a faafeagaiga. Faafetai mo la outou faanonomanu aua faiva o le ta itumalo o lo o faapea ona ou tauavea ai le tofi Minisita ae le gata foi i lea o faiva o lo o faapea ona alo i ai le Palemia ma le Kapeneta ma le tatou Malo ma le Maota nei aua le faatautaiga o atinae o le atunuu. Faafetai tele, ma ia faapena ona faamanuia le Atua i la outou tapuaiga.

Ae paga lea le Maota nei, o le tele foi o taimi ua outou tau le pua ma lafo mai ia te au ua faalupeina o le tama o le itumalo, ia ona o le tele o nisi o faalavelave tutupu mai pea i si o matou itumalo aemaise lava i tulaga tau fualaau faasaina. O le mea lea aua tou te popole, ia toa pea lo outou finagalo, o lo o faapea lava ona galulue malosi le pulega a alii ma faipule i ia tulaga ina

ia faapea ona taumafai ona foia faafitauli ma le tele o tulaga faapena o lo o tutupu mai.

Le tatou itumalo pele, ia, o tatou o le itumalo faamanuiaina, o tatou o le toaiga o Samoa i e faimalaga mai fafo. O le itu lea o lo o popoe i ai finagalo ma taofi o le Maota nei ma le Malo, ia ona o le tele o faalavelave tutupu mai, ae tatalo pea i le Atua i lona tamaoia ina ia to ana faamanuiaga i luga o eleele ia faapena foi ona feliuaiina o outou finagalo ma tatou alo agai i luma le tatou sa ina ia faapena ona avea le tatou itumalo o se itumalo e faamanuiaina ai le tatou atunuu.

Ona faatai lea o se matou leo lau Afioga i le Fofoga Fetalai, ia agalelei le Atua i lenei afiafi, faafetai tele i fautuaga ma faamanuiaga a lena itu o le Maota, ua logoitino le pai mai o a outou fautuaga ma outou faamanuiaga, o le a faapea foi le manatu, o le a avea foi o se matagi agimalu o se pai mai o se savili ia faapena le agi mai o le matagi i le tatou vaa ina ia faapena ona faatautaia le folauga i lenei tausaga. Ia agalelei le Atua ma faamanuia i lenei afiafi i vaega o totoe o le tatou Fonotaga. Ia manuia.

FOFOGA FETALAI: Malo faafetai. Ia ua faafogafoga mai le itumalo o Aana Alofi Nu.3, ia o outou mama na, ae tapuai maia mo se manuia aua le alofaiva o le Afioga i le Minisita mo Fesootaiga ma Faamatalaga Tekonolosi.

Ia, sosoo mai le Afioga i le Minisita mo Faamasinoga ma Pulega tau Faamasinoga.

Afioga Hon FAAOLESA KATOPAU T. AINUU (Minisita mo Faamasinoga ma Pulega tau Faamasinoga): Lau Afioga i le Fofoga Fetalai, e le umi sau tali e tali atu i finagalo faaalua foi o le paia ma le mamalu o le Maota. E faatalofa atu i lenei itula o le po, e faamanuia atu le tausaga fou i lau Afioga i le Fofoga Fetalai, e faapea foi le afio o le Afioga i le Palemia, le Sui Palemia ma le Kapeneta nei, faapea foi le afio o Minisita Lagolago. Liliu atu i lea itu o le Maota i sui usufono mamalu uma o le Palemene, faamalo le tauatai. I lau maitau i ai, e leai ni sui usufono na afea le Matagaluega o Faamasinoga ma le Ofisa o le Komesina o Faiga Palota i felafolafoga i lenei afiafi. E na o le pau lava le sui usufono lea sa afea le Matagaluega o Faamasinoga, o le Afioga i le sui usufono mo Anoamaa Sasae lea sa fesiligia le faiga o talosaga i le tatou Faamasinoga o Fanua ma Suafa, lea faapea sa i ai lona manatu e na o matai e agavaa mo le faauluina o se talosaga. A o lau tali puupuu atu i lea faafesili, e leai, o le Tulafono, e agavaa uma tagata Samoa i le faiga o talosaga i luma o le Faamasinoga o Fanua ma Suafa, ae ou te masalo toetiiti taunuu mai, masalo o le isi tatou Fonotaga lea, o la e tapena le Tulafono fou e tuuina mai e faaalua i ai ni outou finagalo, o le Tulafono o Fanua ma Suafa ae o le Tulafono fou lea e tuu mai i lumamea nei e faaali ai ni outou finagalo ma manatu o le a faapena ona talanoaina ai le fesili lea sa fesili ai Alaiasa.

O le isi fesili lona lua lau Afioga o le atugaluga o le sui usufono i mataupu foi ia ua maea faaiuga a o lea lava e maitau e le sui usufono o lea lava o lo o faataga le toe faaulu o talosaga. E le tusa ai lea faiga pe a faapea o i ai se faiga faapea ma le Tulafono. A faapea ua maea se faaiuga a le Faamasinoga, e le mafai ona toe faauluina se talosaga i lea mataupu ma lea mataupu. A faapea la ua silafia e le sui usufono se faiga faapea o lo o faatino i le Matagaluega o Faamasinoga, ou te fautuaina e faafesootai le Afioga i le alii

pule e fai i ai se fuafuaga a le susuga i le Ofisa Sili o Pulega i lea tulaga. Na o le pau ia o mataupu e lua sa aafia i le saunoaga a se sui usufono.

Ae avea ia lenei avanoa ou te faatalofa atu ai i si ou itumalo o Vaimauga Sisifo Nu.2 i lenei itula, malo le tapuai, malo fai tatalo. Malo tatalo malo tapuai i le afio o Alosina, le Fuaifale o Salevalasi, afifio Matua o Usoalii ma Alo o Malietoa ae puipuiamalu e le fetalai i le Igoamatua ma le Vainalepa ma Tuisamau.

I le tulaga o le Tala Faaopoopo o le Tupe (Nu.1) e avatu foi le lagolago a Vaimauga Sisifo Nu.2 i le Tala o le Tupe e pei ona talanoaina i lenei afaifi. Ma e momoli atu ai i lenei itula faamanuiaga a lenei itumalo i lau Afioga i le Fofoga Fetalai faapea le Palemia ma le Kapeneta ma le mamalu o le tatou usugafono. Faafetai.

FOFOGA FETALAI: Malo saunoa. Ou te iloa ai o le sao lea o saunoaga a Minisita, o le alu sao lava i mea sa laga e sui usufono mamalu e tele ai le tatou taimi ina ia faapena ona faataunuaina galuega a le Kapeneta. Malo faafetai.

Ia ua oo mai le faasologa i lau Afioga i le Minisita mo Aoga, Taaloga ma Aganuu.

Afioga Hon LOAU SOLA KENETI SIO (Minisita mo Aoga, Taaloga ma Aganuu): E faafetai atu i lau Afioga i le Fofoga Fetalai mo le avanoa. Tulouna le Nofoa i lau Afioga i le Fofoga Fetalai, tulouna le Maota nei o lo o afifio ai ma malutau e le paia aua sui usufono filifilia o le Maota Fono o Samoa. Ou te tulai atu foi ma le ava tele, ou te manatu o le a le toe taina i tua le tili lau Afioga i le Fofoga Fetalai i outou paia, o sa ma faiga, aua o lea ua maea ona paepaeulufanua e nisi o tootoo. Ona manatu lea Samoa, o se taimi ou oo atu, ae o le a ou agai atu loa i mataupu sa laga e sui usufono o le Maota. Ua alu lava ananafi ma lenei aso atoa o faapena ona vivii au pe a ou fua i ai, ioe. Ona ou toe manatua ai lea o le faleaitu a Petelo ma Sumeo, òse alofa tuu au i lalo. ò Ui i lea, faafetai mo a outou faamanuiaga, faafetai mo fautuaga e aumai e taoso ai foi ma matimati ai le sao lenei Matagaluega, aua e pei ona silafia o i o le ano ma le fatu aua alo ma fanau ma le lumanai manuia o si o tatou atunuu. O le ala lea e momoli atu ai le agaga o le faafetai i e sa sausaunoa ma momoli mai le agaga o le faamalo ma le faafetai i lenei Matagaluega. A maitau foi i taimi ua tuanai ma tausaga ua alu, ia o au lava na matua sili ona pagatia i le tele o le faaletonu. E ui o lea, afai o lea se galuega ua outou maitau ua lelei, ia aua ia ne i faia ma viiga o le tagata, ae fai ma viiga o le Atua.

O mataupu na laga, o mataupu lava nei e le fou. O mataupu lava nei ta te le i sui usufono foi sa ta faalogologo mai lava i le leitio o laga, laga, laga lava. Ia atonu o le taumafai e atiae mea nei o aoga, o le mafuaaga lena e laga ai nei mataupu.

O faleaoga, ioe, e sao lelei. O lo o faagasolo polokalame o tatou faleaoga, o le JICA, O Ausetalia ma Niu Sila foi o lo o fesoasoani. O galuega faifaatasi ina ia faapena ona galulue faatasi le Komiti ma le Matagaluega o Aoga, ona fai lea o le talosaga momoli. E pei lava ona i ai foi lenei vaitau o lo o fau pea a tatou faleaoga. Alataua Sisifo, o lea ua oo le faaolataga i lau kolisi i Alataua Sisifo. Ou te iloa o le a vave ona faatino. Ua uma foi ona pasia e le Kapeneta, e lua kolisi o le kolisi i le itu lea i Faleata, ma le kolisi fou i Alataua Sisifo ma

le primary school i Faleata ma Salelologa ea foi le isi primary school lea ua faapena ona pasia e le Kapeneta, a o lo o faagasolo galuega, e fua lava i le tatou malosi ma tatou tupe maua.

O nisi o mea na laga, o le va lea o le NUS ma le Polytechnic, na laga foi i le tausaga lea na tuana'i atu e nisi o sui usufono. O le lelei ia o le tulaga lea ina ia faigofie ai foi ona ou malamalama. O lea ua saunoa le isi sui usufono ua fai si maualuga tele o le gagana lea ma te talanoa ai ma lau CEO. E tou te silafia foi o lau CEO, o le Mathematician. Ioe. Shes a profession. A o au la, o au o le VLM. E faafesagai la le lua lea o le polofesa ma le valea le mafaufau, o lona uiga, e tatau ona i ai se gagana e gagana ai. O lea la ma te talanoa lava i mea o fuainumera ina ia atagia ai le tomai lea e ia maua.

FOFOGA FETALAI: Malie lau Afioga i le Toetaufanua se i tulai mai le sui usufono lea pe lavea ai i le faailoga lea e te maua pe sili atu.

Tulai mai le sui usufono mo Palauli le Falefa.

Afioga Hon Faumuina Tiatia Faaolatane Liuga: Lau Afioga i le Fofoga Fetalai, faafetai. Lau Afioga i le Minisita faafetai i le tali mai. Ou te le o talanoa i le va o ouluga, ou te talanoa i le translation o lua mafaufauga maualuluga i faiaoga la e aaoaina tamaiti. O le tele o faiaoga e le malamalama i la ouluga gagana. Faafetai.

FOFOGA FETALAI: Ia tulai mai lau Afioga i le Minisita mo Aoga.

Afioga Hon LOAU SOLA KENETI SIO: Lau Afioga o lea e maitau o lea ua siisii i luga results ma ua improve. O lona uiga, ua malamalama faiaoga i le gagana lea ma te faaogaina. O le ala foi lena o le siitia i luga o le suega a alo ma fanau. O le tulaga lena e pei ona ou lagalaga. Na ou fesili i le VC po o le mea foi lea o le Vice Chancellor, lea e faa-Samoaina e tatou o le Tapaau o le Iunivesite. Na ma talanoa ma faamalamalama mai ia te au le tulaga ua oo i ai le va lea o le Polytech ma le aoga maualuga a le Iunivesite. O le fautuaga na aumai, e pei lava e foliga mai ua laalaa i luma ma le Polytechnic po o vocational schools, a ua amio faa-Iunivesite ai ma tamaiti. A o le auga ma le faamoemoe o le tatou Iunivesite, ia siitia le aoga. A maua lou tusi pasi o oe la e te iu mai le Iunivesite rather than e te iu mai le Polytechnic, e eseese la le lua lea, ioe, pe a e malaga foi i fafo ma e faigaluega ai. O lea foi ua uma ona upgraded uma polokalame o lo o fai i lalo o le Polytechnic po o le TVET e le tatou SQA. O lona uiga ua faataua ma ua mautinoa o lo o lelei polokalame o lo o faaogaina. Ia o le tali mai lea a le VC i le ma talanoaga, talosia ia faapena ona faagasolo ai. Ma le agaga sui usufono sa laga lea tulaga.

O le review, sa ou fesiligia foi lea tulaga. O le tali a le VC, e faagasolo i ai galuega aua le tilotilo i le agai i luma. O le taimi nei, e le o manaomia ona o lo o faapena ona sosolo lelei le alafua aua le tatou Iunivesite faapea foi tatou aoga ia TVET ma vocational schools.

FOFOGA FETALAI: Ia, malie... E le i talia o lea ua saunoa le Minisita e tali atu le vaega lea...

Afioga Leana Ronnie Posini: Lau Afioga i le Fofoga Fetalai, e pei o lea sa ou laga le mataupu lea masalo foi e le na o au e toatele lava sui usufono o

le Palemene. Faafetai tele lava i lau Afioga i le Minisita mo le faamalamalamaina o le mataupu lea. O le ala foi lea o le matou tatalo atu i lau Afioga i le tulaga o le tuufaatasiga lea o lea ua maitau ua ova atu ma le 10 tausaga. O le ala foi lea o le tatalo atu, se i saili lava pe filifilia e lau Afioga se Komisi Suesue se i saili ai e iloa ai le amiotonu o le matou foi mau o lo o tuuina atu i lau Afioga. O lea ua aumai le mau a le Afioga i le Tapaau o le latou pitolaau lea, ou te talitonu foi o le tauleagavaaina o le pulega, a o mea silisili mo le atunuu ma tulaga o ave i ai le faamuamua a le Malo i tulaga tau aoaoga. Ae faafetai tele i lau Afioga i le tulaga tau tulagalua ma tulaga o kolisi i le suiga ua i ai nei. Ma le faaaloalo lava. Faafetai.

FOFOGA FETALAI: Tulai mai le Minisita mo Aoga, Taaloga ma Aganuu.

Afioga Hon LOAU SOLA KENETI SIO: E talia le fautuaga lau Afioga i le Fofoga Fetalai, o le a tilotilo foi i ai i le tulaga lea. O mea ia e check and balance ina ia faapena ona maua le atoaga lelei o le taumafaiga. O le a tilotilo i ai mo le agai i luma. Faafetai mo le fautuaga a le sui usufono.

O malae taalo, talofa e, ioe i nai sui usufono ia o lo o faapena ona lagalaga malae taalo. E sao lelei, alu atu foi le asiasiga o lo o faapena ona tele malae taalo e tatau ona faaleleia. Ioe. E augani le tatou Malo ina ia faapena ona atiae taaloga, ia e le mafai ona fai pe a leaga malae. A ou fua i ai i le taimi na ou taalo ai i le Manu Samoa, o le malae na ou taalo ai e tu le ulu i le ogatotonu, o le fanuaoti le isi pito, o le tulaga fale le isi itu a o le vaieli ou te sikoa i ai. O lona uiga o mea uma na e faaaoga i ai lou mafaufau e te fekamiai solo ai ona e oo lea i luga o le laina sikoa. O lona uiga, e aoga foi malae na e pei e tau maamaa, kami i le maa. E i ai se taimi e oo atu ai le faasologa a o la e ua lelei lau side step i le maa. O le mea la lea, ia toa le tai ma mau le toovae, e taumafai atu lava ina ia faaleleia ia tulaga.

O faiaoga, e sao lelei, ioe. Sioki tatou faiaoga. O lenei lava polokalame i tausaga uma tausaga uma, e sioki lava tatou faiaoga. O le metotia lea ua ou faaaogaina, afai o le primary school o Samusu a o le faiaoga e alu atu i Falevao, ia se i tatou silasila la i ai i le tele tele o le faafitauli. Ona aisea? E leai ni tagata o le nuu lena e o agai i le aoga faafaiaoga. O lona uiga, o le mea lena a tatou sui usufono e fai. E i ai le faaupuga foi lea, òit takes the whole village to raise the child. Ioe, faalogo faalelei mai. Outou ia e tuu mai i i. Takes the whole village to raise the child. O lona uiga o le tatou galuega e faifaatasi, a vaai atu le sui usufono e toatolu faiaoga, alu i ai ma oe i totonu, ioe. Alu e faitau le tusi, aua o le primary 1, 2, 3, o mea e faigofie, one, two, three, alu, pe a le lava faiaoga. O le galuega e faifaatasi, o le faletua o le faifeau, o le faifeau, o le faafeagaiga, ioe. Ina ia faapena la ona maua le agaga lea. Aua a nofo le faiaoga i Falevao ae faiaoga i Samusu, ia se i tatou vaai la i le vave, ia e oo atu ua ta le 1, ua tuua le aoga ona toe alu foi lea i le pasi. Ioe. O le mea la lea, toa le tai, a o lo o taumafai e accommodate mai nai tamaiti ma. Ioe. Ua uma ona ou fai i le VC ma le matou CEO, vaai nai tamaiti o nuu na e tau leai, pe 160 lava, aumai e ave e faafaiaoga aua e alu alu lava lelei. E alu alu lava lelei ina ia mafai ona lava ni a tatou faiaoga.

Lau Afioga i le Fofoga Fetalai, ia o le agaga lena ua taumafai atu ai. O Vaitele o lea ua i ai le primary school ma le kolisi lea ua uma ona pasia e le

Kapeneta aua foi le tele o alo o le tatou atunuu lea ua nopiai mai le itu i sisifo lea.

Ia na pau lea lau Afioga i le Fofoga Fetalai o mataupu na laga mai e sui usufono mamalu. O lea foi sa lagalaga mai le fusuaga a Laauli le ma atalii ma Tui o Lupesoliai fai mai ou te alu i ai. Ia, taatia maia i le Kapeneta e le o i ai Tuivalea i i, taatia mai, ae faafetai i a outou fautuaga, ioe.

Ona manatu lea lau Afioga i le Fofoga Fetalai, o la e faafogafoga mai le matou itumalo...

FOFOGA FETALAI: E moni? Sina upu mo le itumalo lau Afioga.

Afioga Hon LOAU SOLA KENETI SIO: E mai lava i Niuvai ma Mataale, a o le itumalo o tama matutua o le Tuamasaga na o le tapuai lava ma popo seia paia mai Fogaa o le mea na tofofi ai le atunuu. E le tauilo ia faamatalaga lau Afioga i le Fofoga Fetalai, na uma loa ona tofi tuu loa i ai ma Loau nofo loa i Fogaa. O le mea la lea i le tapuaiga a si ou itumalo o Sagaga le Falefa, Ae le ma Aleisa, malo le tapuai, aemaise foi o fatafaitaulaga e fia i Auauna a le Atua o faanonomanu aua se manuia o si o tatou atunuu aemaise si o tatou itumalo. Ia o lea e malosi lava lo outou sui usufono, a outou le vaaia i se taimi, ia, ua vaivai le tino a o lea e malosi lava le loto. Ia manuia tele le Fonousu i lenei aso, manuia lau Afioga i le Fofoga Fetalai, manuia le Taitai ma lenei itu, faapena lena itu, manuia Faauluuluga o Matagaluega o tatou faatasi i lenei itula afiafi, aemaise o le Failautusi o le Fono. Faafetai.

FOFOGA FETALAI: Malo. Ua malie le faafogafoga tapuai mai a Samoa ma le atunuu aemaise o si ou itumalo. Malo faafetai fai o le faiva, malo malele, malo le saunoa, faafetai e le tau selu atu i le saunoaga a lau Afioga i le Minisita mo Aoga, Taaloga ma Aganuu, faafetai.

Ia ua tatou see atu i le Afioga i le Minisita o Tupe.

Afioga Hon SILI EPA TUIOTI: Faafetai i lau Afioga i le Fofoga Fetalai. Lau Afioga i le Fofoga Fetalai, ia e momoli atu muamua le faamalo ma le faafetai i sui usufono mamalu o le Palemene sa lauga sa saunoa faatatau i le Tala o le Tupe. E maitauina o sui usufono mamalu sa saunoa, e latou te lagolagoina atoa le Tala Faatatau Faaopoopo o le Tupe mo le tausaga 2017/2018.

O le tele o mataupu sa laga, e patino lava foi i fuafuaga ma galuega fai a le le tele o Matagaluega, ae ou te talitonu o le a tuu atu pea i Minisita o Matagaluega ma Faalapotopotoga e tali atu i faafesili ia na tuuina mai. Ae mo le tulaga lava ia e tau i galuega a le Matagaluega o Tupe ma le tapenaina o le tatou Tala i le Tupe, ia e momoli atu le faafetai e pei ona silafia ia o lo o gasolo lelei lava le tatou tamaoiga, e le o i ai se tulaga e faapopole ai.

O lo o i ai le fuafuaga e taunuu mai ia le Article for Consultation IMF, ia o le vaega masani lava ia e omai i le faaiuga o Ianuari ma le amataga o Fepuari, e omai e faatalatalanoa ma le tatou Malo ma Matagaluega ma Faalapotopotoga e toe tagatagai ai i le tulaga o lo o i ai le tatou tamaoiga. O a ni vaega e faalelei atili, ae o a foi ni tulaga e mafai ai ona fesoasoani mai ai latou i le tapenaina o tatou e le gata i fuafuaga alualu mamao o le tatou tamaoiga, ia ae faapea foi i le tulaga o le tatou tupe, ia faapea a tatou tupe maua.

E pei ona silafia, o le mafai ona tali atu a le Malo i le tele foi o talosaga a itumalo, i auala, vai ma atinae eseese, o aoga ma le soifua maloloina, ia e faalagolago lava lea i le lava o a tatou tupe e faatupe ai ia nei atinae. E le gata i tupe lava o lo o mafai ona aoina i totonu o le atunuu, ia ae faapea foi i tupe o lo o faameaalofa mai i le tele o a tatou paaga mai fafo ia po o ni tupe foi o lo o nono mai, i ni pasene maualalo. Ia e pei foi ona saunoa ia le tele o sui usufono mamalu o le Palemene, ia o le tulaga lava latou ia o lo o i ai lava le naunau a tatou paaga e tatou te galulue faatasi, e fesoasoani mai i le faatinoina ma le faatupeina o a tatou atinae.

Ia e pei ona laga foi, o le tulaga lea o lo o fai sina telegese o le faatinoina o a tatou galuega. E pei o lea foi sa taua, ua uma ona malilie ia tatou paaga ma le tatou Malo, ina ia toe fai se fesuiaiga ina ia mafai ona faaopoopo mai ni tomai faapitoa lava ia e manaomia o lea e poloka ai le tele o tatou galuega i tulaga tau inisinia, latou o lo o faia designs o tatou auala ma tatou galuega tetele, ia ma i latou e faatinoina fesoasoani i le tulaga lea o le Financial Management. O le naunautaga, ina ia i ai se vaega o le Project Management Unit malosi i totonu o le Ofisa o Tupe, e mafai ona galulue ma matagaluega eseese ma faalapotopotoga ina ia vave le tapenaina o designs, ina ia vave ona faia ia tulaga o le procurement ia ma vave le faagaioiga.

O le tele o le taimi nei, e le o matua lava le capacity o le tatou kamupani ia faapea foi itagata e i ai tomai lea e tatou te manaomia i insinia, e le o lava, e mafai ai ona tatou faatinoa lava e tatou ia tatou galuega na. O lo o ave le faamuamua i feutagaina o lo o faagasolo i inei ma a tatou paaga i fafo ina ia.....o se taimi lata mai nei o le a amata loa ona faatino galuega ia, i le faaopoopo mai lea o i latou nei o lo o i ai tomai nei e fesoasoani i a tatou faalapotopotoga ma le matagaluega.

I le tulaga tau aitalafu na fesiligia ma tupe maua mai, ia o le taimi lenei, ia e pei foi ona saunoa ia le Taitaifono o le Komiti o Tupe Maua ma Tupe Totogi, ia a fua lava i le tulaga o lo o i ai ia le tatou tamaoiga, e leai se tulaga tatou te faapopole ai faapea ua maualuga tele ia tatou nonogatupe, pe ua faigata ona tatou totogia. A fua lava i tatou tupe maua, e le tele se tupe e alu i le totogiina ai o a tatou aitalafu nei. Ia ae manaomia lava e tatou le fesoasoani mai o nai a tatou faigapaaga ia. O le mafuaaga foi lena na pasia ai le tatou Tulafono lea e avea ai tatou ma sui o le Asian Infrastructure Investment Bank, e mafai ona matala mai ia lena faitotoa e fesoasoani ai i le faateleina o nisi o tatou galuega e tatau ona ave i ai ia le faamuamua.

Sa fesiligia le tulaga lea ua tapunia le Yazaki, ae po o ave se fesoasoani ia o le FERRO ma le Sleep Well. O le tali, o lo o ave i ai le fesoasoani, o le tausaga muamua e le totogia se lisi o le faaaogaina o le fale. Lona lua foi, sa talosagaina le Malo o Niu Sila ua aumai le tupe e fesoasoani ai i le toe faaleleia lea o totonu ole fale i le vaevaeina ina ia faapena ona saogalemu ia le galuega. O lo o tapena nei ia le Tender o le vaeluaina o le fale, o lo o faatupe uma e Niu Sila ina ia mafai ai ona faapena faaoga ai e Kamupani ia e lua, ae o lo o i ai foi le avanoa e faaoga ai e nisi kamupani e talosaga atu e faaogaina le tatou fale lena.

O le tele o fesili sa talanoaina o le tulaga lava lea i le faatupeina o le tatou galuega lea o le falepuipui i Tanumalala. E pei foi ona uma ona faamalamalama atu, i lou lava talitonuga, e pei foi ona saunoa le tele o sui usufono, o le tasi lenei atinae taua tele mo le Malo. I lou foi la manatu pe \$15miliona pe \$20miliona pe \$25miliona e fai mautu ai, ia o tupe e alu lelei,

o se atinae taua tele e tele lona sao, aemaise lava i le tulaga ia o lea ua faateleina mai a tatou tagata tafafao ma turisi ma tulaga ia ua tau taofiofi ai le omai i tua ma faasoosa i le tele o le atunuu. E tataua leaga e aafia ai le tatou reputation i tulaga faapena. E manatu o lo o alu lelei, o lo o faagasolo lelei, o lo o monitor foi e le Tenders Board le galuega. Ae masalo o le Tala o le Tupe o le tausaga fou ia o le a aumai ai le paleni e faatupe ai nisi vaega ia o le tatou galuega lea ina ia maea lelei.

Sa tele foi ni fesili ma ni fautuaga i le taulaga i Salelologa. Masalo o lo o silafia ua amata ona faagasolo le...

Tofa Olo Fiti Afoa Vaai: Lau Afioga i le Fofoga Fetalai, masalo na o sina mea lea e fia malamalama ai ona o lea o le a see ese le Afioga i le Minisita ma le vaega lea. Faafetai atu lava ua malamalama uma itu uma pei ona fesiligia e lenei sui usufono ma nisi foi o sui usufono mamalu. Ae na pau lava si vaega ua e saunoa i le taua o le atinae le o le tatou falepuipui ae ao foi ona toe silasila i se tulaga foi lea e le i avea ma mea e le toe fia o ai pagota i tua, aua o le mea foi lele e latalata loa ina uma le latou faasalaga, ona toe o foi lea e fai nisi mea ona o le fia nonofo pea. Na o sina mea foi lele aua le saga faaleleia tele foi aua e le o se hotel le tatou falepuipui, ae fai mo le tulaga foi lele e manaomia mo nai o tagata i falepuipui. Ma le faaaloalo lava.

FOFOGA FETALAI: Malo, tulai mai le Minisita.

Afioga Hon SILI EPA TUIOTI: Ia masalo o le tulaga tonu lava lena e i ai e le faapea o fai ia matua lelei ma comfortable, a o le tulaga foi lea ina ia... lea sa fautua ai foi se tasi o sui usufono mamalu o le Palemene, aemaise lava o le tulaga lea e faamuamua i le toe aoaoina i ni skills ma tulaga faapena, ina ia mafai ona toe foi atu i nuu ma aiga ia mafai ona faaaogaina. I le tulaga sa fesiligia foi le galuega a le Tenders Board, masalo i le tulaga ia o le tuai o le faagasologa o galuega i nisi o aualatetele, o le tele o nisi faafitauli o i ai nei, o le tulaga lea i le faamaea o tulaga ia o le survey ina o fanua, ona o le tulaga i le faiga o surveys na e aafia ai tulaga foi nei o compensation ma tulaga faapena. Masalo o le tasi lena tulaga faafitauli tele ua ala ai ona tuai le galuega lea le auala agai i Malua e faapena foi, o le tulaga lena o lea o lo o tuai ai le galuega lea i Motootua e tau i uta i Vaoala, o tulaga faapena. Ae leai lava se mea e popole ai, o lo o fai lava ma omai vaega ia a le Faletupe o le Lalolagi ma latou, o lo o fai talanoaga o lo o galulue faatasi ina ia vave foia le faafitauli lea ae faaaoga a tatou tupe. O lo o i ai foi se agaga faapea e manao e toe aveese le tupe pe a tuai, o la e aumai lava i le taimi e aumai lava pe faatolu pe faafa i le tausaga e fai talanoaga, o lo o malamalama foi i le tulaga lea o lo o i ai nei.

Masalo o le tele foi o fautuaga a sui usufono mamalu o le Palemene i le taimi nei i le tulaga o galuega ia e manaomia o auala, suavai ma tulaga faapena, o le a fesoasoani lea i le faatulagaga foi o le tatou Tala Autu o le Tupe mo le tausaga fou. O le taimi nei o lo o galulue le Ofisa o Tupe ma le Faletupe Tutotonu i le tulaga foi lea se i tau faamautu le Macroeconomic Framework e faatatau i ai le tapenaina o le Tala o le Tupe. O lo o vaavaai foi lea i le tatou tupe maua e mafai ona maua i lea tausaga, tatou vaai foi po o a ia atinae lea ua ave i ai le faamuamua a le Malo, ona a mautu loa le tulaga lena, o lea ua i ai le faamoemoe po o le amataga o lea masina po o le

ogatotonu o le a valaau uma ai lava ia Pulega o Faalapotopotoga ma Matagaluega a le Malo, ina ia omai e fai le faatalatalanoaga ma le Ofisa o Tup le Central Bank, ina ia faapena ona malamalama ai i le tulaga lea o le a faatulaga ai le Tala o le Tupe. O se tulaga lelei lena ina ia o atu ai e tapena mai se latou foi talosaga mo tupe manaomia i le tausaga fou, a o la e ua malamalama lelei lava i le tulaga lea o le a faataatia ai ia atinae ma galuega o lo o faamuamua a le Malo. Masalo o le a fesoasoani lena i ai i le tulaga o a ia ni atinae atonu ua le tatau ona toe faaaauu, ae faaliliu mai nisi tupe na e aumai e ave ai i nisi atinae ia o lo o talosaga mai i ai ia itumalo e ave i ai le faamuamua. Ae mo le taimi nei, masalo na o le pau lena o le tali atu i le tulaga i faiga faavae ma le lautele, a o le tele o fesili, o le a tuu atu i Minisita o Matagaluega ma Faalapotopotoga e tali atu i fesili na.

Lau Afioga i le Fofoga Fetalai, ia, e momoli atu le faafetai tele i lau Afioga i le faatautaia o le tatou Fono, e momoli atu le faafetai tele i sui usufono mamalu o le Palemene mo fautuaga na tuuina mai.

E avea foi lenei taimi e momoli atu ai nai moomooga alofa i le matou itumalo Faasaleleaga Nu.1 i Sasae i Tapaau ma Salelologa. E momoli atu le faamalo ma le faafetai i la outou tapuaiga ua faigofie ai foi ona faatino le galuega ona o le tatalo ma tapuai mai. O le tatalo ia faapea ona faamanuia le Atua Silisiliese i le tatou itumalo ma le tatou nuu. Faafetai foi i lau Afioga mo le avanoa. Faafetai lava. Soifua.

FOFOGA FETALAI: Malo faafetai i le saunoaga malamalama i lau Afioga i le Minisita o Tupe. Ia, ma ua oo mai le faasologa i le Tamaitai Minisita, le Afioga i le Minisita mo Tina ma Tamaitai, Atinae o Nuu ma Afioga ma Agafesootai.

Tofa Hon FAIMALOTOA KIKA IEMAIMA STOWERS (Minisita mo Tina ma Tamaitai, Atinae o Nuu, Afioga ma Agafesootai): Faafetai lava i lau Afioga i le Fofoga Fetalai mo le avanoa. Ua leva foi le afiafi ua faamalo lavapapale i lau Afioga i le faatautaia o le Fonousu a Samoa o lo o faafogafoga mai. Faamalo foi i le Palemia, Sui Palemia ma le mamalu o le Aiga Kapeneta, a outou Afioga i Minisita Lagolago aemaise o sui usufono mamalu uma o le tatou Palemene.

E faatalofa atu foi i le Susuga i le Failautusi ma le mamalu o le Ofisa o le Fono o lo o tautuaina le tatou Fonotaga. E faatalofa atu foi i Faauluuluga o Matagaluega ma Faalapotopotoga a le tatou Malo o lo o tatou faatasi i lenei po. Malo le galulue malo le fai o le faiva. Ia avea foi lenei taimi e faatalofa atu ai foi i le faafogafoga tapuai mai a Samoa. E i ai le talitonuga e le o matamata se isi i se TV, o lo o ki mai uma latou leitio e faafogafoga mai i taualumaga o le Fonousu a Samoa.

I le faafogafoga mai a Lana Afioga Mamalu, O Le Ao o le Malo ma lana Masiofo, Sui o le Fono a Sui Tofia, e faapena le paia o Samoa i ona tulaga faalupe, ia o le a nuunu atu aua o paia e le avea, o paia e tumau mai le vavau e oo i le faavavau.

E faapena foi ona momoli atu le faafetai tele i le tapuaiga a le Aufaigaluega paia a le Atua i so o se fatafaitaulaga o lo o faapena ona nonomanu ma tapuai aua se manuia o Samoa mo a taeo.

Ae o lenei foi taimi, e muamua ona ou faatalofa aloaia atu ma ofo alofa atu i le paia o si ou itumalo pele o Gagaiforma Nu.1, o le paia lava lea i le afio

o Sao e Fa, Aiga Sa Umalau, le Ati Pouniu ma le Faasau, lau fetalaiga i le Tulafale na e muaimalae, aemaise le mamalu o Safotu ma Aiga. Si o matou nuu i Manase i le susu o Taito ma le fetalaiga ia Tauasa, aemaise le aufaigaluega paia a le Atua. Malo le tapuai, faafetai tatalo ua manuia ai feau ma galuega o lena tausaga ua tuanai i totonu o aiga, aemaise si o tatou itumalo pele ia Safotu ma Manase. E tatalo ia agalelei pea le Atua i la tatou folauga, aemaise o feau ma galuega i lenei tausaga e ala i la outou tatalo ma la outou tapuaiga.

Ia lau Afioga i le Fofoga Fetalai, e maitauina e leai ma se isi na afea lenei Matagaluega se i vagana ai le sui usufono mamalu o Aleipata Itupa i Luga lea sa ia taua komiti tumama i le toe lalaga mai aua le soifua maloloina lelei ma le soifua manuia o nai o tatou aiga, nuu ma afioaga. Faamalo faafetai. Masalo o le galuega le o lo o tuu malosi atu i ai le tauau o lenei Matagaluega, e le gata i le soifua maloloina, ae pei ona silafia le taumafai o le Kapeneta ma Matagaluega e galulue faapaaga i so o se tafa ma so o se galuega i nuu ma afioaga i le auga o le faamoemoe i le taunuuga o le galuega, ina ia soifua fiafia, soifua manuia Samoa ma ona tagata.

E leai la se tala tele, pau o lea, e maitauina lava ma o le a ou faaaogaina lenei minute ou te tatalo atu ai i le paia o le Fonousu a Samoa i sui usufono mamalu uma o le Palemene i le tele o faafitauli o lo o tutupu mai i le sauaga o tina ma fanau i faalavelave eseese ua aafia ai le soifua ma le ola ona o le limatete, o faigata ma mafatiaga e tutupu mai i fualaa faasaina, aemaise o fanau e le o faapena ona tulimatai e tatou matua ma aiga. E i ai le talitonuga e faapena ona talosagaina lo outou paia ma lo outou mamalu e ala i le galuega o lo o faagasolo atu e lenei Matagaluega o lo o i ai nei le pulega o le Matagaluega i le motu i Salafai e lua itumalo o lo o galulue ai i lenei vaiaso, ina ia faapena ona tulai mai a outou Afioga i sui usufono mamalu na tusilima i ai nuu ma itumalo uma o Samoa, tulai mai e taulamua e taitai le atinae o le tatou atunuu. Aua a manuia aiga taitasi, o nuu taitasi, itumalo taitasi e talitonu o le galuega lea a le Atua ua tatou faia aua le manuia lautele o si o tatou atunuu mo a taeao.

Lau Afioga i le Fofoga Fetalai, ia o le talosaga lea, faafetai tele i lenei afiafi i le lavapapale o sui usufono mamalu uma, o lo o faafogafoga mai si o tatou atunuu po o le a le tatou mea o fai, a o le a le galuega o lo o e faatino, ia tatou o atu ia e tatou faafesagai ma o tatou aiga, le fonu a alii ma faipule o nuu taitasi, tatou soalaupule le manuia o Samoa mo a taeao. Faafetai i lau Afioga i le Fofoga Fetalai, manuia lava le Fono.

FOFOGA FETALAI: Malo faafetai saunoa i lau Afioga i le Tamaitai Minisita mo Tina ma Tamaitai, Atinae o Nu, Afioaga ma Agafesootai.

Ia ma ua ou manatu o lea ua tatou tulalata i le tatou taimi manava. Ia, e manatu foi ua vela le fala, ua api le uli, ua alofa foi i le Kapeneta, aemaise foi o sui usufono mamalu o le Palemene. E i ai le manatu o le a tuu atu taeao le saunoaga a lau Afioga i le Minisita mo Tupe Maua.

Ae tatou te le i tolopo ma tapa foi se tatalo e faaiu ai le tatou Fonotaga i lenei afiafi, e maua i lau vaai le tulai mai o le sui usufono mo Faasaleleaga Nu.2 lau fetalaiga Pau. Ia, e faamalulu atu ne i te i ua maitau mai le itumalo o Faasaleleaga Nu.2 pe o e auai i le tatou Fonotaga. Ae o lea ua faafogaga le itumalo sa e tulai mai e te fia saunoa, ae ua see lou vaa ma ua fai foi lau faaiuga. Ona ou manatu lea, aua ne i avea le nofoa e see i luma see i tua i se

faaiuga e tausi ai le mamalu o le Palemene, ne i avea lou ava atu ma toe fetuunai ai a tatou Tulafono Tumau. Ae mo le faafofoga mai a le itumalo, o lea sa tulai mai lava le fetalaiga ia Pau e fia saunoa ae ona ua televave lau faaiuga. O le mea lea ou te faamalulu atu i le sui usufono mamalu. Ma e momoli atu le faafetai ma le faamalo i le tatou galuega tele i lenei aso. E i ai le manatu e leai lava se faiva e aunoa ma se maumau, afai foi ua sala uta ia tonu tai i la outou faautautaga. E le toe mamao foi se manatu o le Fofoga Fetalai, a o le agaga lava ina ia faapena ona faatino la tatou galuega e ala i a tatou Tulafono Tumau.

Ae tatou te le i tolopo ou te tapa le sui usufono mo Aana Alofi Nu.2 na te faaiuina le tatou Fonotaga i se tatalo.

Na tolopo Tualumaga a le Fono Aoaofa i le itula e 10:55 i le po seia aulia le itula e 9:00 i le taeao o le Aso Tofi, 25 Ianuari 2018.